

四庫全書

子部

欽定四庫全書

冊府元龜卷一百八十二 宋 王欽若等 撰

閔位部

總序

仲尼有言化合神者稱皇德合天者稱帝德合仁義者稱王斯並穹昊有命厯數在躬大庇生民奄宅區宇者也其或真人未應中夏多難本非靈心之所眷暫爲人望之攸屬或紹承於大統或專據於一方雖復置宗祊

改正朔建官以治嚮明以朝然與受河洛之符應龍馬之紀者殊矣故載籍譬之閏餘明其非正焉昔庖犧氏繼天而王德始於木其後三正五運迭相紹襲而共工氏雖伯九州自謂水德居犧農水火之間非其序也故不載於易不見於書茲閏之始也降及嬴秦雖并六國亦自謂水德復在周漢水火之間又非其序也故高祖弗之繼班氏謂之伯此亦共工氏之比也其後建安失御三國分峙魏文受山陽之禪都天地之中謂之正統

得其宜矣劉先主僻處梁益孫大帝遠據江左自竊尊
名靡有神器誠非共工之匹然亦異於正統故同爲閔
馬劉氏雖爲孝景之後有季漢之稱蓋以赤伏之數已
盡黃星之兆又彰不足據矣及晉元南遷雲擾迭盛瞻
烏之嘆生於中原餘分之基傳於江左沅夫典午凌替
靈寶篡迫故宋武撥亂而起馬及元徽兇惡天王肆逆
故齊高專政而代馬暨東昏奢淫蕭懿被殺故梁武興
兵而取馬建江陵不守貞陽被廢故陳武假名而興馬

雖則自謂水火木土之運然而都邑居於下國聲教隔於中州永初始基不能混一長城失德歸於夷滅城郭翦而無餘宗祀倏而俱滅隋氏早已受宇文之禪應炎上之德則此與夫爲虞賓助周祭者殊矣故亦謂之閔焉其後唐氏衰微朱梁凌奪雖則稱金行宅天邑然而莊宗以長安之屬籍總大鹵之兵威自是中興殄茲仇敵首藏於大社家靡於遺統斯亦不得爲正矣故繼之於閔共工之迹舊史無聞然秦氏而下凡八朝焉以其

聲名文物憲章禮樂方冊所紀咸有可觀至於昏弱之迹凌夷之政亦可爲鑒戒代厥盤盂今並著之於篇若夫王莽桓玄之類皆不終其身自取其斃唐末諸方鎮或功德無聞或封疆至小並存別部不得與於斯焉凡七十八門

氏號 誕生 名諱

氏號

自秦盜周鼎二世而滅赤伏之末孫劉並起江表四代

介于南紀東魏析派高齊逼禪逮于朱梁遂移唐祚率
非五行更代之序乃當紫色餘分之日其於命族之本
系享年之修促號謚之稱傳襲之數咸用討於史牘類
例比次蓋有條而不紊披文而可見也

秦始皇姓嬴氏其先帝顛頊之苗裔孫取女脩女脩織
玄鳥隕卵女脩吞之生子大業大業取少典之子曰女
華生大費與禹平水土已成帝錫玄圭禹受曰非予能
成亦大費爲輔帝舜曰咨爾費贊禹功其賜爾皐苒爾

後嗣將大出乃妻之姚姓之玉女

謂錫之玄玉妻以姚姓之女也

大費

拜受佐舜調馴鳥獸多馴服是爲栢翳舜賜姓嬴氏大費生子二人一曰大廉實鳥俗氏二曰若木實爲費氏其玄孫曰費昌子孫或在中國或在夷狄費昌當夏桀之時去夏歸商爲湯御以敗桀於鳴條大廉玄孫曰孟戲中行鳥身人言帝太戊聞而卜之使御吉遂致使御而妻之自大戊以下中行之後遂世有功以佐殷國故嬴姓多顯遂爲諸侯其玄孫曰中湍

一作滑

生蜚廉蜚廉

生惡來父子俱以材力事紂蜚廉復有子曰季勝季勝生孟增幸於周成王是爲宅皐狼皐狼生衡父衡父生

造父徐偃王作亂

臨淮有徐縣古徐國

造父爲穆王御長驅歸周

以救亂穆王以趙城封造父

趙城在河東永安縣

造父族繇此爲

趙氏自蜚廉生季勝已下五世至造父別居趙趙襄其後也惡來草者蜚廉子也早死有子曰女防女防生旁皐旁皐生太几太几生大駱大駱生非予以造父之寵皆蒙趙城姓趙氏非子居犬丘

今槐里也

孝王召使主馬于

汧渭之間孝王欲以非子爲大駱適嗣而大駱娶申侯

之女生子成爲適乃分土爲附庸邑之秦今天水隴西縣秦亭復

使續嬴氏祀號曰秦嬴秦嬴生秦侯秦侯生公伯公伯

生秦仲秦仲立三年周厲王無道諸侯咸叛之西戎反

王室滅犬丘大駱之族周宣王即位秦仲之十八年也乃以秦

仲爲大夫誅西戎西戎殺秦仲秦仲立二十二年死於

戎有子五人其長者曰莊公周宣王乃召莊公昆弟五

人與兵七千人使伐西戎破之於是復予秦仲後及其

先大駱地犬丘并有之爲西垂大夫莊公居其故西犬
丘生子三人其長男世父曰戎殺我大父仲我非殺戎王
則不敢入邑遂將擊戎讓其弟爲太子莊公立四十年
卒太子代立是爲襄公襄公七年周幽王爲犬戎所殺
襄公將兵救周戰甚力有功又以兵送平王東遷平王
封襄公爲諸侯賜之岐以西之地曰戎無道侵奪我岐
豐之地秦能攻逐戎即有其地與誓封爵之襄公十二
年卒文公立四十八年文公太子卒謚爲靖公靖公之

長子爲太子是文公孫也五十年文公卒靖公子立是爲寧公寧公立十二年卒有子三人長男武公爲太子武公弟德公同母魯姬子生出子寧公卒大庶長弗忌威壘三父廢太子而立出子爲君出子六年三父等復殺出子立故太子武公二十年武公卒立其弟德公德公立二年卒生子三人長子宣公中子成公少子繆公宣公立十二年卒生子九人莫立立其弟成公成公立四年卒子七人莫立立其弟繆公立三十七年用

繇余謀伐戎王益國十二開地千里遂霸西戎三十九年繆公卒有子四十人其太子瑩代立是爲康公康公立十二年卒子共公立共公五年卒子桓公立桓公二十七年卒子景公立景公四十年卒子哀公立哀公三十六年卒太子夷公蚤死立夷公子爲惠公惠公立十三年卒子悼公立悼公十二年卒子厲共公立厲共公三十四年卒子躁公立躁公十四年卒立其弟懷公懷公四年自殺太子昭子蚤死大臣乃立昭子之子是爲靈

公靈公十年卒子獻公不得立立靈公季父悼子是爲
簡公簡公十六年卒子惠公立惠公十二年卒子出子立出
子二年庶長迎靈公子獻公于河西而立之獻公二十
四年卒子孝公立孝公二十四年卒子惠文君立是爲
惠王惠王十四年更爲元年至十四年卒子武王立武
王四年卒無子立異母弟是爲昭襄王昭襄王五十六
年卒子孝文王立孝文王元年卒子莊襄王立莊襄王
二年卒子政立是爲秦始皇帝在位三十七年子胡亥

立是爲二世皇帝二世三年諸侯並起叛秦趙高殺二世立子嬰子嬰立月餘諸侯誅之遂滅秦

蜀先主姓劉氏涿郡人漢景帝子中山靖王勝之後勝子貞元狩六年封涿縣陸城亭侯坐酎金失侯因家焉先主祖雄父弘世仕州郡雄舉孝廉官至東郡范令建安二十六年四月先主即皇帝位於成都武擔之南在位三年太子禪立是爲後主母曰甘皇后在位四十年降於魏封安樂公至太始七年薨於雒陽

吳大帝姓孫氏名權吳郡富春人蓋孫武之後父堅爲後漢破虜將軍領豫州刺史獻帝初平三年袁術使堅征荊州爲黃祖軍士所射殺興平元年術以堅部曲還其子策爲折衝校尉行殄寇將軍平定江東策自領會稽太守術既僭號策以書絕之魏太祖表策爲討虜將軍封爲吳侯建安五年爲吳郡太守許貢客所殺創甚乃呼權以印綬授之黃初元年魏受漢禪二年封權爲吳王其年魏遣曹休等圍南郡權遂改年黃武臨江拒

守九年四月權即皇帝位母曰吳皇后在位三十四年
年七十一太子亮嗣位是爲廢帝母曰皇后潘氏在位
七年大將軍孫綝廢爲會稽王時年十六綝迎權第六
子瑯琊王休紹位是爲景帝母曰敬懷皇后王氏在位
七年年三十薨謚曰景皇帝兄子皓紹位是爲歸命侯
皓廢太子和之子權之孫也母曰昭獻皇后何氏在位
十七年降於晉賜號歸命侯死於雒陽年四十二

宋高祖武帝姓劉氏彭城縣綏里人漢高帝弟楚元王

交二十一世孫交生紅懿侯富富生宗正辟彊辟彊生陽
城繆侯德德生陽城節侯安民安民生陽城釐侯慶忌
慶忌生陽城肅侯岑岑生宗正平平生東武城令令生
東萊太守景景生明經洽洽生博士弘弘生琅邪都尉
惺惺生魏定襄太守某史失名某生邪城令亮亮生晉北
平太守膺膺生相國掾熙熙生開封令旭孫旭孫生混始
過江居晉陵郡丹徒縣之京口里官至武原令混生東
安太守靖靖生郡功曹翹翹生帝晉元熙二年四月以

宋王受禪即皇帝位于建康宮太極殿母曰穆皇后趙氏在位三年年六十七太子義符紹位是為少帝母曰張夫人在位三年撫軍將軍謝晦司空錄尚書事徐羨之等宣太后令廢帝為滎陽王又使中書舍人邢安泰害之年十九羨之等迎武帝第三子宜都王義隆紹位是為文帝母曰胡婕妤在位三十年年四十七為太子劬所弑第三子駿紹位為孝武帝母曰路淑媛在位十一年年三十五太子子業紹位是為前廢帝母曰王皇后

在位二年爲湘東王或所廢年十七或遂紹位是爲明
帝母曰沈婕妤在位八年年三十太子昱紹位是爲後
廢帝母曰陳貴妃在位六年年十五爲齊王蕭道成所
廢以明帝第三子安成王準紹位是爲順帝母曰陳昭
華明帝晚年痿疾不能御內諸弟姬有懷孕者取入宮
乃生男與六宮所愛者養之而殺其母順帝即桂陽
王休範子也母不知
何以而以昭華爲母在位三年年十三禪于齊

南齊太祖高皇帝姓蕭氏漢相國何二十四世孫何子
鄴定侯延生侍中彪彪生公府掾章章生皓皓生仰仰

生御史大夫望之望之生光祿大夫育育生御史中丞
紹紹生光祿勳閎閎生濟陰太守闡闡生吳郡太守永
永生中山相苞苞生博士周周生蛇丘長矯矯生州從
事遠遠生孝廉休休生廣陵郡丞豹豹生太中大夫裔
裔生淮陰令整整生即丘令雋雋生輔國參軍樂子樂
子生右軍承之承之生帝初何居沛何孫彪免官居東
海蘭陵縣中都里晉元康年分東海爲蘭陵郡中朝亂
淮陰令整過江居晉陵武進縣僑置本土加以南名於是

爲南蘭陵人也帝以宋順帝昇明三年四月遂受禪即
皇帝位母曰孝皇后陳氏在位四年年五十六太子贇
紹位是爲武帝母曰劉皇后在位十一年年五十四皇
太孫昭業紹位是爲鬱林王母曰皇太子妃王氏在位
一年年二十二爲高帝庶兄始安王道生之子西昌侯
鸞所殞迎新安王昭文紹位是爲海陵王在位一年亦
爲西昌侯鸞所殺年十五鸞紹位是爲明帝母曰懿后
在位五年年四十七太子寶卷紹位是爲東昏侯母曰

明敬劉皇后在位四年雍州刺史蕭衍舉義奉明帝第八子荊州刺史南康王寶融即位於江陵是爲和帝舉兵向闕冠軍將軍王珍國侍中張稷率兵入殿殞之年十九和帝在位二年禪于梁爲梁所殞年十五

梁高祖武帝姓蕭氏蘭陵中都里人漢相國何之後何生鄴定侯延延生侍中彪彪生公府掾章章生皓皓生仰仰生太傅望之望之生光祿大夫育育生御史中丞紹紹生光祿勳閔閔生濟陰太守闡闡生吳郡太守永永生

中山相苞苞生博士周周生蛇丘長矯矯生州從事達
達生孝廉休休生廣陵郡丞豹豹生太中大夫喬喬生
淮陰令整整生濟陰太守鎔鎔生州治中副副生南臺
治書道賜道賜生順之齊高帝族弟也參預佐命封臨
湘縣侯歷官侍中衛尉太子詹事領軍將軍丹陽尹贈
鎮北將軍順之生帝齊中興二年四月梁王受禪即皇
帝位母曰獻皇后張氏帝在位四十八年年八十六太
子綱紹位是爲簡文帝母曰穆太后丁氏在位三年爲

侯景所廢年四十九武帝第七子荊州刺史持節都督
荆雍湘司郢寧梁南北秦九州諸軍事湘東王繹即位
于江陵是為孝元帝母曰文宣太后阮氏在位三年江
陵為西魏所陷帝遂遇害帝第九子晉安王方智立是
為敬帝母曰夏太后在位二年禪于陳帝薨於外邸年
十六

後梁宣帝武帝之孫昭明太子統之第三子中大通三
年封岳陽郡王歷官宣惠將軍知石頭戍事琅邪彭城

二郡太守東陽州刺史及江陵陷爲周太祖所立稱皇帝於其國在位八年年三十四太子歸立是爲明帝在位二十三載年四十四太子琮立二年隋文帝徵入朝因留不遣

陳高祖武帝姓陳氏吳興長城下若里人漢太丘長寔之後世居潁川寔玄孫準晉太尉準生匡匡生達永嘉南遷爲丞相掾歷太子洗馬出爲長城令悅其山水遂家焉達生康康生盱眙太守英英生尚書郎公弼公弼

生步兵校尉鼎鼎生散騎常侍高高生懷安令詠詠生
安成太守猛猛生太常卿道巨道巨生文讚文讚生
帝梁敬帝太平二年十月以陳王受禪即皇帝位母曰
董氏安皇后帝在位三年年五十七兄子臨川郡王禧
紹位是爲文帝在位七年太子伯宗紹位是爲廢帝母
曰沈皇后在位二年太皇太皇后令降爲臨海郡王以
始興昭烈王第二子太尉安成王頊紹位是爲孝宣帝
在位十四年年五十三太子叔寶紹位母曰柳皇后在

位八年貞明三年正月爲隋所滅遂降于隋至仁壽四年薨於雒陽年五十二

東魏孝靜帝姓元氏後魏孝文帝之曾孫清河王亶之孫嗣清河王亶之世子母曰胡妃孝武帝永熙三年八月拜開府儀同三司孝武入關大將軍渤海王高歡與百官會議推帝以奉明帝之後時年十一在位十七年禪于北齊明年薨于中山國年二十八

北齊顯祖文宣帝姓高氏渤海脩人七世祖隱晉玄菟

太守隱生慶慶生泰泰生湖三世仕慕容氏及慕容寶
敗國亂湖率亂衆歸魏爲右將軍湖生四子第三子謚
仕魏位至侍御史坐法徙居懷朔鎮謚生樹樹生歡仕
東魏爲丞相歡薨長子澄嗣遇害帝以母弟嗣位天平
八年六月以丞相齊王受禪即皇帝位母曰婁太后在
位十年年三十一太子殷紹位是爲廢帝母曰李皇后
在位一年年十七文宣母弟常山王演立是爲孝昭帝
在位一年年二十七母弟長廣王湛立是爲武成帝在

位五年禪位于太子緯是爲后主

武成年二十一

后主母曰胡

皇后在位十二年爲後周所滅年二十二

梁太祖神武元聖孝皇帝姓朱氏宋州碭山人其先舜
司徒虎之後高祖黠曾祖茂琳祖信父誠帝即誠之第
三子母曰文惠王皇后唐哀帝天祐四年四月以相國
梁王受禪即皇帝位在位八年年六十一明年第四子
東京留守均王友貞平庶人友珪紹位是爲末帝母曰
元貞張皇后在位十一年爲後唐所滅

誕生

夫天命所佑運歷攸歸有開必先休應斯見故其生也必有禎符之朕神靈之紀以啓其祚焉非獨乘五勝而起繼三統而王者有是徵也至於居餘分之次擅一方之地者亦復嘉祥貴象兆於厥初斯蓋上稽靈心雖殊於天序下觀人事亦異於常民表神道之玄遠成史氏而昭著者矣

秦始皇以昭王四十八年正月生於邯鄲及生名爲政

以正月
旦生日

吳武烈帝堅母懷妊夢腸出繞吳昌門寤而懼之以告鄰母鄰母曰安知非吉徵也

大帝母吳氏孕而夢月入其懷既而生策及帝在孕又夢日入其懷以告堅曰昔妊策夢月入我懷今也又夢日入我懷何也堅曰日月者陰陽之精極貴之象吾子孫其興乎

廢帝亮以赤烏七年三月生於內殿

宋高祖以晉哀帝興寧元年歲次癸亥三月壬寅夜生神光炤室盡明是夕甘露降於墓樹

少帝以晉義熙二年生於京口高祖年踰不惑尚未有男及帝生甚悅

文帝以晉義熙三年生於京口

孝武帝以文帝元嘉七年八月庚午夜生有光炤室

前廢帝以元嘉二十六年正月甲申生

明帝以元嘉十六年十月戊寅生

後廢帝以大明七年正月辛丑生於衛尉府

順帝太始五年癸丑生

南齊高祖以宋元嘉四年丁卯生

武帝以元嘉二十七年六月己未生於建康縣之清溪

宅其夜陳孝后高帝母劉昭后帝母也同夢龍據屋上故小

字龍兒

梁高祖以宋孝武大明八年甲辰歲生於秣陵縣同夏里三橋家初帝母張后嘗夢抱日已而有娠其後忽見

庭前昌蒲花光采非常遂取吞之是月生帝將產之夕有異光后見庭內若有衣冠陪列焉

簡文帝以天監二年十月丁未生于顯陽殿

孝元帝母阮脩容夢龍罩其床

一云夢月墮懷中

天監七年八

月丁巳生帝于後宮舉室中非常香有紫胞之異

陳高祖以梁天監二年癸未歲生于吳興長城下若里廢帝以梁承聖三年五月庚寅生

宣帝以梁大通二年七月辛酉生有赤光滿堂室

後主以梁承聖二年十一月戊寅生於江陵

北齊文宣帝母婁太后既孕每夜有赤光炤室私嘗怪之及產名之曰侯尼鮮卑言有相子也初婁太后有孕六男二女皆感夢孕文襄則夢一斷龍文宣則夢一大龍首尾屬天地張口動目勢狀驚人孝昭則夢蠕龍於地武成則夢龍浴於海

後主母胡后夢於海上坐玉盆日入裙下遂有娠天保七年五月五日生於并州邯鄲

幼主母穆皇后武平元年六月生於鄴

梁太祖以唐大中六年壬申歲十月二十一日生於碭山縣午溝里是夕所居廬舍之上有赤氣上騰里人望之皆驚奔來曰朱家火發矣至則廬舍儼然既而鄰人以誕孩告衆咸異之

開平元年五月辛巳有司奏以降誕之日爲大明節休假前後各一日十月庚午大明節內外臣寮各進奇貨良馬上壽故事內殿開宴召釋道二教對御談論宣旨

罷之命閤門使以香合賜宰臣佛寺行香

二年十月己未大明節諸道節度刺史各進獻鞍馬銀
器綾帛以祝壽宰臣百官設齋於相國寺

三年十月癸未大明節帝御文明殿設齋僧道召宰臣
翰林學士預之諸道節度刺史及內外諸司使咸有進

獻臣欽若等曰梁太祖實錄
獻自開平四年後不書誕節

末帝以唐文德元年戊申歲九月十二日生於東京乾
化二年三月文武百官上言請以九月十二日帝降誕

日爲明聖節休假三日

名諱

名以制義所以著象類之說諱不偏下所以申臣子之情是知名諱之來古今通道而餘分之在位亦偏方之所奉雖本以嘉稱期於象德或求諸義訓契彼未然蓋成敗之有端若符應之素定然則稽之人事察彼天道諒盛衰之在德豈名稱之足云乎

秦始皇帝名政以昭王四十八年正月生於邯鄲

一云名正

以正月旦
生故也

二世皇帝名胡亥

始皇時燕人盧生奏周書緯亡秦者胡也始皇不知此爲人名反備北胡

蜀先主名備字玄德

後主名禪字公嗣譙周曰春秋傳著晉穆侯名太子曰仇弟曰成師師服曰異哉君之名子也嘉耦曰妃怨耦曰仇今君名太子曰仇弟曰成師始兆亂矣况其替乎其後果如服言及漢靈帝名二子曰史侯董侯既立爲帝後皆免爲諸侯備言具也禪言授也若言漢已具矣

當授與人也意者甚於穆侯靈帝之名蜀既亡咸以周
言爲驗

吳大帝名權字仲謀

廢帝名亮字子明

景帝名休字子烈

後主名皓字元景一名彭祖字皓宗

宋高祖名裕字德興小字寄奴

孔子河洛讖曰空穴無
主奇人中女子獨立又

爲
雙

少帝名義符小字車兵

文帝諱義隆小字車兒

孝武帝諱駿字休龍小字道民

前廢帝諱子業小字法師

明帝諱彧字體炳小字榮期

後廢帝諱昱字德融小字慧震初明帝諸子在孕皆以周易筮之即以所得之卦爲小字故帝字慧震其餘皇子亦如之

順帝諱準字仲謀小字知觀

南齊太祖諱道成字紹伯小字鬪將王子年歌曰欲知其姓草肅肅穀中最細低頭熟穀中精細者稻即道也熟猶成也孝經鈞命決曰誰者起視將皆帝之符應也

閔位徵
應門

武帝諱頤字宣遠小字龍兒

鬱林王諱昭業字元尚小字法身

海陵王諱昭文字季尚

明帝諱鸞字景栖小字玄度

東昏侯諱寶卷字智藏本名賢明帝輔政後改焉

論者曰名

以行義住賢垂範備而之禪術士識之東昏已卷矣藏以終之其兆先徵蓋天所命矣

和帝諱寶融字知昭

梁高祖諱衍字叔達小字練兒帝初爲梁王將受齊禪
沈約言於帝曰識之行中水作天子此乃歷數在記

簡文帝諱綱字世讚小字六通

元帝諱繹字世誠小字七符

敬宗諱方智字惠相小字法真

後梁宣帝諱譽字理孫

明帝諱歸字仁遠

召國公諱琮字溫文

陳高祖諱霸先字興國小字法生

文帝諱蒨字子章

廢帝諱伯宗字奉業小字樂王

宣帝諱頊字紹世小字師利

後主諱叔寶字元秀小字黃奴初文帝謂宣帝曰我諸子皆以伯爲名汝諸子宜用叔爲稱宣帝因以訪毛喜喜即條自古名賢杜叔英虞叔卿等二十餘人以啓之文帝稱善或言後主名叔寶反語爲少福敗亡之徵也東魏孝靜帝諱善見

北齊文宣帝諱洋字子進母神武明太后生帝於晉陽其後童謠曰一東藁兩頭然河邊殺獍飛上天藁然兩頭於文爲高字河邊殺獍爲水邊羊指帝名也

廢帝諱殷字正道初文宣命邢邵爲帝名字從而尤之
曰殷家弟及正字一止吾身後兒不得也邵懼請改焉
文宣不許曰天也

孝昭帝諱演字延安

武成帝諱湛

後主諱緯字仁綱初清河末武帝夢大蝟攻破鄴城故
索境內蝟膏以厭之識者以後主名聲與蝟相協亡齊
徵也

梁太祖諱晁初名溫唐僖宗中和三年授宣武軍節度使賜名全忠天祐四年受禪下令曰王者創業興邦立名傳世必難知而示訓從易避以便人或稽其符命應彼開基之義垂諸象德之言爰考簡書求於往代周王昌發之號漢帝詢衍之文或崇一德以徽稱或爲二名而更易先王令典布在縑緗寡人本名兼於二字且異帝王之稱仍兼避易之難郡職縣官多須改換况宗廟不遷之業憲章百世之規事叶典儀豈憚草易寡人今

改名冕是以天意雅符於明德日光顯契於瑞文昭融
萬邦理斯在是庶順玄穹之意永臻康濟之期宜令有
司分告天地宗廟其舊名中外章疏不得更有迴避
末帝諱頊初名友貞即位下制曰朕仰膺天眷近雪家
讐旋開將相之謀請紹祖宗之業羣情見迫三讓莫從
祇受推崇懼不負荷方欲烝嘗寢廟裡類郊丘合徵定
體之辭用表事神之敬其或於文尚淺在理未周亦冀
隨時別圖制義雖臣子行孝重更名於已孤而君父稱

尊貴難知而易避今則虔遵古典詳考前聞允諧龜筮
之占庶合帝王之道載惟涼德尤愧嘉名中外羣僚當
體朕意宜改名鏗貞明中又改爲頊或解云頊字一十
一十月一八果以一十一年十月九日亡

冊府元龜卷一百八十二

欽定四庫全書

冊府元龜卷一百八十三 宋 王欽若等 撰

閏位部

勲業

自秦承六世之餘烈并吞宇內武功震耀遂建大號立
德憑宗室之緒仲謀藉父兄之業遭值世亂分據勢勝
奄宅吳蜀是爲鼎國宋齊梁陳迭主南紀東魏北齊創
都於鄴莫不因嗷嗷之資糾桓桓之旅或仗義慷慨或

乘機奮發解紛排難夷兇禁暴威懷兼濟以成厥功咸能驅策賢智而任其謀訓練驍果而盡其力勤身征伐以清外侮積日累勞以稔民聽然後謳訟咸集嗜欲將至端委揖讓南面而君民者焉

秦始皇帝莊襄王之子

臣欽若等曰自莊襄王已上事具列國君部諸門

年十

三代莊襄王立爲秦王當是時秦地已并巴蜀漢中越宛有郢置南郡北收上郡以東有河東太原上黨郡東至滎陽滅二周置三川郡呂不韋爲相招致賓客游士

欲以并天下李斯爲舍人

主廩內小吏官名也或曰侍從賓客謂之舍人也

蒙

騫王齮

一作齮

庶公爲將軍

庶秦邑

王年少初即位委國事

大臣元年晉陽反蒙騫擊定之二年庶公將軍攻卷斬

首三萬三年蒙騫攻韓取十三城又攻魏氏暘有詭四

年拔之五年攻魏定酸棗

陳留有酸棗縣

燕虛長平

平一作十汝南有長

平雍丘山陽

陳留有雍丘縣河內有山陽縣

皆拔之取二十城六年韓

魏趙衛楚共擊秦取壽陵秦出兵五國兵罷拔衛迫東

郡其君角率其支屬徙居野王阻其山保魏之河內七

年蒙騫死以攻龍孤慶都

慶一作熙

還兵攻汲八年王弟長

安君成蟠將軍擊趙九年攻魏垣蒲陽十一年將軍王

翦桓齧楊端和攻鄴取九城王翦攻闕與棹陽

在并州

十

三年桓齧攻趙平陽殺趙將扈輒斬首十萬十四年攻

趙軍於平陽取宜安破之殺其將軍定平陽武城十五

年大興兵一軍至鄴一軍至太原取狼孟

屬太原

十六年

發卒受地韓南陽假守騰魏獻地於秦秦置麗邑十七

年內史騰攻韓得韓王安盡納其地十八年大興兵攻

趙王翦將上地

蓋咸陽面
爲上地也

下井陘

山

端和將河內圍邯

鄆城羗羗伐趙十九年羗與王翦盡定取趙地東陽得
趙王引兵欲攻燕屯中山趙公子嘉率其宗數百人之
代自立爲代王東與燕合兵軍上谷二十年使王翦卒
勝攻燕燕代發兵擊秦軍秦軍破燕易水之西二十一
年王賁攻薊乃益發卒詣王翦軍遂破燕軍取燕薊城
得太子丹之首二十二年王賁攻魏引河溝灌大梁城
壞其王請降盡取其地二十三年王翦擊荆取陳以南

至平興

縣名在汝南

虜荆王二十五年大興兵使王賁將攻

燕遼東得燕王喜還攻代虜代王嘉王翦定荆江南地
降越君二十六年齊王建與其相后勝發兵守其西界
不通秦秦使王賁從燕南攻齊得齊王建遂并天下爲
始皇帝

蜀先主涿郡涿縣人祖雄父弘世仕州郡

臣欽若等曰自弘已上事

具閏位氏號門吳及宋齊已下放此

先主少孤好交結豪俠年少爭附之

中山大商張世平蘇雙等貲累千金乃多與之金財先

主繇是得用合徒衆後漢靈帝末黃巾起先主率其屬

從校尉鄒靖討賊有功除安喜尉

縣名屬中山

督郵以公事

到縣先主求謁不通直入縛督郵杖二百解綬繫其頸

著馬柳棄官亡命頃之大將軍何進遣都尉母丘毅詣

丹陽募兵先主與俱行至下邳遇賊力戰有功除爲下

密丞後去官後爲高唐尉遷令爲賊所破往奔中郎將

公孫瓚瓚表爲別部司馬使與青州刺史田楷拒冀州

牧袁紹數有戰功試守平原令後領平原相郡民劉平

素輕先主耻爲之下使客刺之客不忍刺語之而去袁
紹攻公孫瓚先主與田楷東屯齊曹公征徐州徐州牧
陶謙遣使告急於田楷楷與先主俱救之時先主自有
兵千餘人及幽州烏丸雜胡騎又畧得饑民數千人既
到陶謙以丹陽兵四千益先主先主遂去楷歸謙謙表
爲豫州刺史屯小沛謙病篤謂別駕糜竺曰非劉備不
能安此州也謙死竺率州人迎先主先主未敢當下邳
陳登謂先主曰今漢室陵遲海內傾覆立功立事在於

今日彼州殷富戶口百萬欲屈使君撫臨州事先主曰
袁公路近在壽春此君四世五公海內所歸君可以州
與之登曰公路驕豪非治亂之主今欲爲使君合步騎
十萬上可以安主濟民成五霸之業下可以割地守境
書功於竹帛若使君不見聽許登亦未敢聽使君也北
海相孔融謂先主曰袁公路豈憂國忘家者邪冢中枯
骨何足介意今日之事百姓與能天與不取悔不可追

先主遂領徐州

時陳登等遣使詣袁紹曰天降災殄禍
臻鄙州州將殞生民無主恐懼姦雄

一旦乘隙以貽盟主日昃之憂輒共奉故平原相劉備
府君以爲宗主永使百姓知有依歸方今寇難縱橫不
遑釋甲謹遣下吏奔告于執事紹答曰劉立
德弘雅有信義今徐州樂戴之誠副所望也袁術來攻

先主拒之於盱眙淮陰曹公表先主爲鎮東將軍封宜
城亭侯是歲建安元年也先主與術相持經月呂布乘
虛襲下邳下邳守將曹豹反間迎布布虜先主妻子先
主轉軍於海西楊奉韓暹寇徐揚間先主邀擊盡斬之
先主求和於呂布布還其妻子先主遣關羽守下邳遂
還小沛復合兵得萬餘人呂布惡之自出兵攻先主先

主敗走歸曹公曹公厚遇之以爲豫州牧將至沛收散
卒給其軍糧益與兵使東擊布布遣高順攻之曹公遣
夏侯惇往不能救爲順所敗復虜先主妻子送布曹公
自出東征助先主圍布於下邳生禽布先主復得妻子
從曹公還許表先主爲左將軍禮之愈重出則同輿坐
則同席袁術欲經徐州北就袁紹曹公遣先主督朱靈
路招要擊術未至術病死先主未出時獻帝舅車騎將
軍董承僻受帝衣帶中密詔當誅曹公先主未發是時

曹公從容謂先主曰今天下英雄惟使君與操耳本初

之徒不足數也先主方食失匕箸

時正當雷霆先主謂曹公曰聖人云迅雷

風烈必變良有以也一震之威乃何至於此

遂與承及長水校尉种輯將軍

吳子蘭王子服等同謀會見使未發事覺承等皆伏誅

時承等與先主謀未發而備出承謂服曰郭多有數百

兵推李權數萬人但足下與吾同義耳昔呂不韋之門

須子楚而後高今吾與子繇是也服曰惶懼不敢當且

兵又少承曰舉事訖得曹公成兵顧不足邪服曰今涼

師豈有所任乎承曰長水校尉种輯

議即吳碩是吾腹心辦事者遂定計先主據下邳靈等

還先主乃殺徐州刺史車胄留關羽守下邳而身還小

沛東海昌霸反郡縣多叛曹公爲先主衆數萬人遣孫
乾與袁紹連和曹公遣劉岱王忠擊之不克五年曹公
東征先主先主敗績曹公盡收其衆虜先主妻子并禽
羽以歸先主走青州青州刺史袁譚先主故茂才也將
步騎迎先主先主隨譚到平原譚馳使白紹紹遣人將
騎道路奉迎身去鄴二百里與先主相見駐月餘日所
失亡士卒稍來集曹公與袁紹相拒於官渡汝南黃巾
劉辟等叛曹公應紹紹遣先主將兵與辟等畧許下關

羽亡歸先主曹公遣曹仁將兵擊先主先主還紹軍陰欲離紹乃說紹南連荊州牧劉表紹遣先主將本兵復至汝南與賊龔都等合衆數千人曹公遣蔡陽擊之爲先主所殺曹公既破紹自南擊先主先主遣糜竺孫乾與劉表相聞表自郊迎以上賓禮待之益其兵使屯新野荊州豪傑歸先主者日益多表疑其心陰禦之先主駐荊州數年嘗於表坐起至廁見髀裏肉生慨然流涕還坐表怪問備曰平常身不離鞍髀肉皆消今不復騎

髀裏肉生日月若馳老將至矣而功業不建是以悲耳
表使先主拒夏侯惇于禁等於博望久之先主設伏兵
一旦自燒屯偽遜惇等追之爲伏兵所破十一年曹公
北征烏丸先主說表襲許表不能用曹公南征會表病
篤託國於先主曰我兒不才而諸將並零落我死之後
卿便攝荊州先主曰諸子自賢君其憂病或勸先主宜
從表言先主曰此人待我厚今從其言人必以我爲薄
所不忍也表卒其子琮代立遣使乞降曹公不告先主

先主亦不知久之乃覺遣所親問琮琮令宋忠詣先主
宣旨是時曹公在宛先主大驚駭謂忠曰卿諸人作事
如此不早相語今禍至方告我不亦太劇乎引刀向忠
曰今斷卿頭不足以解忿亦耻大丈夫臨別復殺卿輩
遣忠去乃呼部曲議或勸先主劫琮將及荊州吏士徑
南到江陵先主答曰劉荊州臨亡託我以孤遺背信自
濟吾所不爲死何面目以見劉荊州乎乃駐馬呼琮
懼不能起琮左右及荊州人多歸先主先主過辭表墓

涕泣而去比到當陽衆十餘萬輜重數千兩日行百餘里別遣關羽乘船數百艘使會江陵或謂先主曰宜速行保江陵今雖擁大衆被甲者少若曹公兵至何以拒之先主曰夫濟大事必以人爲本今人歸吾吾何忍棄去曹公以江陵有軍實恐先主據之乃釋輜重輕軍到襄陽聞先主已過曹公將精騎五千急追之一日一夜行三百餘里及於當陽之長坂先主棄妻子與諸葛亮張飛趙雲等數十騎走曹公大獲其人衆輜重先主斜

趣漢津適與羽船會得濟沔遇表長子江夏太守琦衆
萬餘人與俱到夏口先主遣諸葛亮自結於孫權權遣
周瑜程普等水軍數萬與先主并力與曹公戰於赤壁
大破之焚其舟船先主與吳軍水陸并進追到南郡時
又疾疫北軍多死曹公引歸先主表琦爲荊州刺史又
南征四郡武陵太守金旋長沙太守韓玄桂陽太守趙
範零陵太守劉度皆降廬江雷緒率部曲數萬口稽顙
琦病死羣下推先主爲荊州牧治公安

江表傳曰備立營於油口改名

爲公安 權稍畏之進妹固好先主至京見權綢繆恩紀十

六年益州牧劉璋遙聞曹公將遣鍾繇等向漢中討張
魯內懷恐懼別駕從事蜀郡張松說璋曰曹公兵強無
敵於天下若因張魯之資以取蜀楚誰能禁之者乎璋
曰吾固憂之而未有計松曰劉豫州使君之宗室而曹
公深讐也善用兵若使之討魯魯必破魯破則益州強
曹公雖來無能爲也璋然之遣法正將四千人迎先主
前後賂遺以巨億計正因陳益州可取之策

先主前見張松後得

法正皆厚以恩意接納盡其殷勤之歡因問蜀中濶狹兵器府庫人馬衆寡及諸要害道里遠近松等具言之又盡地圖山川處所是盡知益州虛實也先主留諸葛亮關羽等據荊州

將步卒數萬人入益州至涪璋自出迎相見甚歡張松令法正白先主及謀臣龐統進說便可於會所襲璋先主曰此大事也不可倉卒璋推先主行大司馬領司隸校尉先主亦推璋行鎮西大將軍領益州牧璋增先主兵使擊張魯又令督白水軍先主并三軍萬餘人車甲器械資貨甚盛是歲璋還成都先主北到葭萌未即討

魯厚樹恩德以收衆心明年曹公征孫權權呼先主自
救先主遣使告璋曰曹公征吳吳憂危急孫氏與孤本
爲唇齒又樂進在青泥與關羽相拒今不往救羽進必
大克轉侵州界其憂有甚於魯魯自守之賊不足慮也
乃從璋求萬兵及資寶欲以東行璋但許兵四千其餘
皆給半先主激怒其衆曰吾爲益州征彊敵師徒勤瘁
不遑寧居今積帑藏之財而怯於賞功望士大夫爲出
死力戰其可得乎張松書與先主及法正曰今大事垂

可立如何釋此去乎松兄廣漢太守肅懼禍逮已白璋
發其謀於是璋收斬松嫌隙始構矣璋敕關戍諸將文
書勿復關通先主先主大怒召璋白水軍督楊懷責以
無禮斬之乃使黃忠卓膺勒兵向璋先主徑至關中質
諸將并士卒妻子引兵與忠膺等進到涪據其城璋遣
劉瓚冷苞張任鄧賢等拒先主於涪皆破敗退保綿竹
璋復遣李嚴督綿竹諸軍嚴率衆降先主軍益彊分遣
諸將平下屬縣諸葛亮張飛趙雲等將兵泝流定白帝

江州江陽維關羽留鎮荊州先主進軍圍雒時璋子循

守城被攻且一年十九年夏雒城破進圍成都數十日

璋出降

時璋遣帳下司馬張裔詣先主先主許以禮其君而安其人也裔還城門乃開先主以裔爲己

郡太守

蜀中殷盛豐樂先主置酒大饗士卒取蜀城中金

銀分賜將士還其穀帛先主復令益州牧諸葛亮爲股

肱法正爲謀主關羽張飛馬超爲爪牙許靖麋竺簡雍

爲賓友二十年孫權以先主已復益州使使報欲得荆

州先主言須得涼州當以荊州相與權忿之乃遣呂蒙

襲奪長沙零陵桂陽三郡先主引兵五萬下公安令關羽入益陽是歲曹公定漢中張魯遷走巴西先主聞之與權連和分荊州江夏長沙桂陽東屬南郡零陵武陵西屬引軍還江州

今夔州也

遣黃權將兵迎張魯張魯已降

曹公曹公使夏侯淵張郃屯漢中數數犯暴巴界先主令張飛進兵宕渠與郃等戰於瓦口破郃等收兵還南鄭先主亦還成都二十三年先主率諸將進兵漢中分遣將軍吳蘭雷銅等入武都皆爲曹公所沒先主次于

陽平關與淵邵等相拒二十四年春自陽平南渡沔水
緣山稍前因定軍山勢作營淵將兵來爭其地先主命
黃忠乘高鼓譟攻之大破淵軍斬淵邵及曹公所署益
州刺史趙顥等曹公自長安舉衆南征積月不拔亡者
日多乃引軍還先主遂有漢中遣劉封孟達李平等攻
申耽於上庸是秋羣下上先主爲漢中王表於漢帝於
是還治成都時關羽攻曹公將曹仁禽于禁於樊俄而
孫權襲殺羽取荊州二十五年魏文帝稱尊號改年曰

黃初或傳聞漢帝見害乃發喪制服追謚曰孝愍皇帝是後在所並言衆瑞日月相屬郡臣上尊號即皇帝位於成都武擔之南

吳孫堅吳郡富春人少爲縣吏年十七與父共載船至錢塘擊殺海賊胡玉等繇是顯聞府召署假尉會稽妖賊許昌起於句章自稱陽明皇帝與其子韶扇動諸縣衆以萬數堅以郡司馬募召精勇得千餘人與州郡合討破之是歲熹平元年刺史臧旻列上功狀詔書除堅

鹽漬丞數歲徙盱眙丞又徙下邳丞歷三縣所在有稱

吏民親附中平元年黃巾賊帥張角起於魏郡託有神

靈遣八使以善道教化天下而潛相連結自稱黃天泰

平三月甲子三十六萬一旦俱發天下響應燔燒郡縣

殺害長吏

角稱天公將軍角弟寶稱地公將軍寶弟梁稱人公將軍

漢遣車騎將軍

皇甫嵩中郎將朱雋將兵討擊之雋表請堅為佐軍司

馬鄉里少年隨在下邳者皆願從堅又募諸商旅及淮

泗精兵合千許人與雋并力奮擊所向無前

一云堅乘勝深入於

西華失利堅被創墮馬卧草中軍衆分散不知堅所在
堅所騎驄馬馳還營培地呼鳴將士隨馬於草中得堅堅
還營十數日創少愈乃復出戰汝穎賊困迫走保宛城堅身當一面登

城先入衆乃蟻附遂大破之雋具以狀聞上拜堅別部
司馬邊章韓遂作亂涼州中郎將董卓拒討無功中平
三年遣司空張溫行車騎將軍西討章等溫表請堅與
參軍事尋拜議郎時長沙賊區星自稱將軍衆萬餘
人攻圍城邑乃以堅爲長沙太守到郡親率衆士施設
方略旬月之間克破星等

堅到郡郡中震服任用良吏
勅史曰謹遇良善治官曹文

書必循治以周朝郭石亦帥徒衆起於零桂與星相應

盜賊付太守遂越境尋討三郡肅然

堅爲長沙太守是時廬江太守陸康從子作宜春長爲賊所攻

遣使求救於堅堅整嚴救之主簿進諫堅答曰太守無文德以征伐爲功越界攻討以全異國以此獲罪何愧

海內乎乃進兵往救賊聞而走漢朝錄前後功封堅烏程侯董卓擅

朝政橫恣京城諸州郡並興義兵欲以討卓堅亦舉兵

荊州刺史王叡素遇堅無禮堅過殺之比至南陽衆數

萬人南陽太守張咨聞軍至晏然自若堅以牛酒禮咨

咨明日亦答詣堅酒酣長沙主簿入白堅前移南陽而

道路不治軍資不具請收主簿推問意故咨大懼欲去
兵陳四周不得出有頃主簿復入白堅南陽太守稽停
義兵使賊不時討請收出案軍法從事便牽咨於軍門

斬之郡中震慄無求不獲

一云南陽太守張咨既不給軍糧又不肯見堅堅欲進兵

恐有後患乃詐得疾舉軍震惶迎呼巫醫禱祀山川遣所親人入說咨言病因欲以兵付咨咨聞之心利其兵即將步騎五六百人詣營省堅堅卧與相見無何卒然而起按劍罵咨遂執斬之 前到魯陽與

袁術相見術表堅行破虜將軍領豫州刺史遂治兵於
魯陽城當進軍討董卓遣長史公孫稱將兵從事還州

督促軍糧施慢於城東門外祖道送稱官屬並會卓遣步騎數萬人逆堅輕騎數十先到堅方行酒談笑勅部曲整頓行陣無得妄動後騎漸益堅徐罷坐導引入城乃謂左右曰向堅所以不即起者恐兵相蹈藉諸君不得入耳卓兵見堅士衆甚整不敢攻城乃引還堅移屯梁東大爲卓軍所攻堅與數十騎潰圍而出復相收兵合戰於陽人大破卓軍梟其都督華雄等是時或問堅於袁術術懷疑不運軍糧陽人去魯陽百餘里堅夜馳

見術術踧踏即調發軍糧堅還屯卓憚堅猛將乃遣將
軍李傕等來求和親令堅列疏子弟任刺史郡守者許
表用之堅曰卓逆天無道蕩覆王室今不夷汝三族縣
示四海則吾死不瞑目豈將與乃和親邪復進軍大谷
距雒九十里卓自出與堅戰於諸陵墓間卓敗走却屯
龜池聚兵於陝堅進雒陽宣陽城門更擊呂布復破走
堅乃掃除宗廟平塞諸陵分兵出函谷關至新安龜池
間以截卓後卓謂長史劉艾曰關東諸將數敗矣無能

爲也惟孫堅小懲諸將軍宜慎之是時關東州郡務相
兼并以自彊大袁紹遣會稽周暉爲豫州刺史來襲取
州堅慨然歎曰同舉義兵將救社稷逆賊垂破而各若
此吾當誰與戮力乎言發涕下初平三年袁術使堅征
荊州劉表表遣黃祖逆於樊鄧之間堅擊破之追渡漢
水遂圍襄陽單馬行峴山爲祖軍士所射殺一云堅悉其衆攻表
表閉門夜遣將黃祖潛出發兵祖將兵欲還堅逆與戰
祖敗走竄峴山中堅乘勝夜追祖祖部兵從竹水間暗
射堅殺之時年三十七又云劉表將呂公將兵緣山
向堅堅輕騎尋山討公公兵下石中堅頭應時腦出

子貴帥將士衆就術術表貴爲豫州刺史權既稱尊號
謚堅曰武烈皇帝

策堅之長子初興義兵策將母徙居舒與周瑜相友收
合士大夫江淮間人咸向之堅薨還葬曲阿已乃渡江
居江都徐州牧陶謙深忌策策舅吳景時爲丹陽太守
策乃載母徙曲阿與呂範孫河俱就景因緣召募約數
百人時張紘有母喪策數詣紘啓以世務曰方今漢祚
中微天下擾攘英雄雋傑各擁衆營私未有能扶危濟

亂者也先君與袁氏共破董卓功業未遂卒爲黃祖所
害策雖暗稚竊有微志欲從袁陽州求先君餘兵就舅
氏於丹陽收合流散東據吳會報讐雪恥爲朝廷外藩
君以爲何如絃答曰既素空劣方居縑絰之中無以奉
贊盛略策曰君高名播越遠近懷歸今日事計決之於
君何得不紆慮啓告副其高山之望若微志得展血讐
得報此乃君之勲力策心所望也因涕泣橫流顏色不
變絃見策忠壯內發辭令慷慨感其志意乃答曰昔周

道陵遲齊晉並興王室已寧諸侯貢職今君紹先侯之軌有驍武之名若投丹陽收兵吳會則荆揚可一讐敵可報據長江奮威德誅除羣穢佐輔漢室功業侔於桓文豈徒外藩而已哉方今世亂多難若功成事立當與同好俱南濟也策曰一與君同符合契同有永固之分今便行矣以老母弱弟委付於君策無復回顧之憂策徑到壽春見袁術涕泣而言曰亡父昔從長沙入討董卓與明使君會於南陽同盟結好不幸遇難勲業不終

策感惟先人舊恩欲自憑結願明使君垂察其誠術甚
貴異之然未肯還其父兵術謂策曰孤始用貴舅爲丹
陽太守賢從伯陽爲都尉彼精兵之地可還依召募幾
遂詣丹陽依舅得數百人而爲涇縣大帥祖郎所襲幾
至危殆於是復往見術術以堅餘兵千餘人還策太傅
馬日磾仗節安集關東在壽春以禮辟策表拜懷義校
尉策騎士有罪逃入術營隱於內屢策指使人就斬之
訖詣術謝術曰兵人好叛當共疾之何爲謝也繇是軍

中益畏憚之術欲攻徐州從廬江太守陸康求米三萬斛康不與術遣策攻康拔之先是劉繇爲揚州刺史州舊治壽春壽春術已據之繇乃渡江治曲阿時吳景尚在丹陽策從兄賁又爲丹陽都尉繇至皆迫逐之景賁退舍歷陽繇遣樊能于麋陳橫屯江津張英屯當利口以拒術術自用故吏琅邪惠衢爲揚州刺史更以景爲督軍中郎將與賁共將兵擊英等連年不克策乃說術乞助景等平定江東

策說術云家有舊恩在東願助舅討橫江橫江拔因投本土召募可

得三萬兵以佐明使君經濟漢室術知其恨而以術表
劉繇據曲阿王郎在會稽謂策未必能定故許之
策爲折衝校尉行殄寇將軍兵財千餘騎數十匹賓客
願從者數百人比至歷陽衆五六千策母先自曲阿徙
於歷陽策又徙母阜陵渡江轉鬪所向皆破莫敢當其
鋒而軍令整肅百姓懷之策年少雖有位號而士民皆
呼爲孫郎百姓聞孫郎至皆失魂魄長吏委城郭竄伏
山草及至軍士奉令不敢虜略雞犬菜茹一無所犯民
乃大悅競以牛酒詣軍劉繇既走策入曲阿勞賜將士

遣將陳寶詣阜陵迎母及弟發恩布令告諸縣笮融等
故鄉部曲來降首者一無所問樂從軍者一身行復除
門戶不樂者勿彊也旬日之間四面雲集得見兵二萬
餘人馬千餘匹威震江東形勢轉盛吳人嚴白虎等衆
各萬餘人處處屯聚吳景等欲先擊破虎等乃至會稽
策曰虎等羣盜非有大志此成禽耳遂引兵渡浙江據
會稽屠東治白虎高壘堅守使其弟興請和許之興請
獨與策會面約既會策引白刃斫席興體動策笑曰聞

卿能坐躍勦捷不常聊戲卿耳輿曰我見必乃然策知其無能也乃以手戟投之立死輿有勇力白虎衆以其死也甚懼進攻破之盡更置長吏策自領會稽太守復以吳景爲丹陽太守以孫賁爲豫章太守分豫章爲廬陵郡以賁弟輔爲廬陵太守丹陽朱治爲吳郡太守彭城張昭廣陵張紘秦松陳端等爲謀主時袁術僭號策以書諫曰董卓無道陵虐王室禍加太后暴及弘農天子播越宮廟焚毀是以豪傑發憤沛然俱起元惡既斃

少主東顧乃使主人奉命宣明朝恩偃武修文與之更
始然而河北異謀於黑山曹操毒被於東徐劉表僭亂
於荆南公孫叛逆於朔北正禮阻兵玄德爭盟是以未
獲從命橐弓戢戈當謂使君與國同規而舍是弗恤宛
然有自取之志懼非海內企望之意也成湯討桀稱有
夏多罪武王伐紂曰殷有重罰此二王者雖有聖德假
使時無失道之過無繇逼而取也今主上非有惡於天
下徒以幼小脅於強臣異於湯武之時也又聞幼主明

智聰敏有夙成之德天下雖未被其恩咸歸心焉若輔而興之則且與之美率土所望也使君五世相承爲漢宰輔榮寵之盛莫與爲比宜效忠守節以報王室時人多惑圖緯之言妄牽非類之交苟以悅主爲美不顧成敗之計古今所慎可不熟慮忠言逆耳駁義致憎苟有益於尊名無所敢辭術不納策遂絕之曹公表策爲討逆將軍封爲吳侯

一云建安二年夏漢朝遣議郎王輔奉戊辰詔書曰董卓逆亂凶國害民

先將軍堅念在平討雅意未遂歆美著聞策遵善道求福不回今以策爲騎都尉襲爵烏程侯領會稽太守策

上表謝曰臣以固陋孤持邊陲陛下廣播膏澤不遺細節以臣襲爵兼典名郡仰惟榮顧非所克堪興平二年十二月二十日於吳郡曲阿得袁術所呈表以臣行殄寇將軍至被詔書乃知詐擅雖輒捐廢猶用悚悸臣年十七喪失所怙懼有不任堂構之鄙以忝析薪之戒誠無去病十八建功世祖列將弱冠佐命臣初領兵年未弱冠雖駑懦不武然思竭微命惟術狂惑爲惡深重臣馮威靈奉辭伐罪庶必獻捷以報所受袁術死長史楊弘大將張勳等將其衆欲就策廬江太守劉勳要擊悉虜之收其珍寶以歸策聞之僞與勳好盟勳新得術衆時豫章上繚宗民萬餘家在江東策勸攻勳取之勳既行策輕軍晨夜襲拔廬江勳衆盡降勳獨與麾

下數百人自歸曹公

江表傳曰策被詔勅與司空曹公衛將軍董承益州牧劉璋等協力

討袁術劉表軍嚴當進會術死術從弟裔女壻黃猗等畏懼曹公不敢守壽春乃共舁術棺柩扶其妻子及部曲男女就劉勲於皖城勲糧食少無以相振乃遣從弟偕告糴於豫章太守華歆歆郡素少穀遣吏將偕就海昏上繚使諸宗帥共出三萬斛米以與偕偕住歷月纔得數千斛偕乃復勲具說形狀使勲來襲誅之勲得偕書便潛軍到海昏邑下宗帥知之空壁逃匿勲了無所得時策西討黃祖行及石城聞勲輕身詣海昏便分遣從兄賁輔率八千人於彭澤待勲自與周瑜率二萬人步襲皖城即克之得術百工及鼓吹部曲三萬餘人并術勲妻子表用汝南李術爲廬江太守給兵三千人以守皖皆徙所得人東詣吳賁輔又於彭澤破勲勲求入楚江從尋陽步上到置馬亭聞策等已克皖乃投西塞至沂築壘自守告恚於劉表求救於黃祖祖遣太子射

船軍五千人助勲策復就攻大破勲勲與偕北歸曹公射亦遁走策收得勲兵三千餘人船千艘遂前進夏口攻黃祖時劉表遣從子虎南陽韓晞將長矛五千來爲黃祖前鋒策與戰大破之吳錄載策表曰臣討黃祖以十二月八日到祖所屯沙羨縣劉表遣將助祖並來趣臣臣以十一日平旦部所領江夏太守行建威中郎將周瑜領林陽太守行征虜中郎將呂範領零陵太守行蕩寇中郎將程普行奉義校尉孫權行先登校尉韓當行武鋒校尉黃蓋等同時俱進身跨馬櫟陳手擊急鼓以齊戰勢史士奮擊踊躍百倍心精意果各競用命越渡重壑迅疾若飛火放上風兵激煙下弓弩並發流矢雨集日加辰時祖乃潰爛鋒刃所截焱火所焚前無生冠惟祖逃走獲其妻息男女七人斬虎狼韓晞以下三萬餘級其赴水溺者二萬餘口船六千餘艘財物山積雖表未禽祖宿狡猶爲表腹心出作爪牙表之鴟張以祖氣息而祖家屬卽曲掃地無餘表孤特之虜成鬼行

尸誠皆聖朝神武遠振
臣討有罪得效微勤

是時袁紹方強而策并江東曹

公力未能逞且欲撫之乃以弟女配策小弟匡又爲子

章取賁女皆禮辟策弟權翊又命揚州刺史嚴象舉權

茂才建安五年曹公與袁紹相拒於官渡策陰欲襲許

迎漢帝密治兵部署語未發會爲故吳郡太守許貢客

所殺先是策殺貢貢小子與客亡匿江邊策單騎出卒

與客遇客擊傷策

陳登爲廣陵太守治射陽登即瑀之從兄子也孫策前西征登陰復遣間

使以印綬與嚴白虎餘黨圖爲後害以報瑀見破之辱策歸復討登軍到丹徒須待運糧策好獵將步騎數出

策驅馳逐鹿所乘馬精駿從騎絕不能及初吳郡太守許貢上表於漢帝曰孫策驍雄與項籍似宜加貴寵召還京邑若被詔不得不還若放於外必作後患策候吏得貢表以示策請貢相見以責讓貢貢辭無表策即令武士絞殺之貢奴客潛民間欲爲貢報讐獵日卒有三

人即貢客也策問爾等何人答曰是韓當兵在此射鹿耳策曰當兵吾皆識之未嘗見汝等因射一人應弦而倒餘二人怖急便舉弓射策中頰後騎尋至皆刺殺之

劉甚請張長史昭等謂曰中國方亂夫以吳越之衆三

江之固足以觀成敗公等善相吾弟呼權佩以印綬謂

曰舉江東之衆決機於兩陣之間與天下爭衡卿不如

我舉賢任能各盡其心以保江東我不如卿至夜卒時

年二十六權稱尊號追謚策曰長沙桓王

權策之弟策既定諸郡時權年十五以爲陽羨長郡察
孝廉州舉茂才行奉義校尉建安四年從策征廬江太
守劉勲勲破進討黃祖於沙羨五年策薨以事授權哭
未及息策長史張昭謂權曰孝廉此寧哭時邪乃改易
權服扶令上馬使出巡軍曹公表權爲討虜將軍領會
稽太守屯吳使丞之郡行文書事待張昭以師傅之禮
而周瑜程普呂範等爲將帥招延俊秀聘求名士魯肅

諸葛瑾等始爲賓客分部諸將鎮撫山越討不從命初孫策表用李術爲廬江太守策亡之後術不肯事權而多納其亡叛權移書求索術報曰有德見歸無德見叛不應復還權大怒乃以狀白曹公曰嚴刺史昔爲公所用以是州舉將而李術凶惡輕犯漢制殘害州司肆其無道宜速誅滅以懲醜類今欲討之進爲國朝掃除鯨鯢退爲舉將報塞怨讐此天下達義夙夜所甘心術心懼誅復詭說求救明公所居阿衡之任海內相瞻願勅

執事勿復聽受是歲舉兵攻術於皖城術閉門自守求救於曹公曹公不救糧食乏盡婦女或丸土而吞之遂屠其城臬術首徙其部曲三萬餘人八年權西伐黃祖破其舟軍惟城未克而山寇復動還過豫章使呂範平鄱陽會稽程普討樂安太史慈領海昏韓當周泰呂蒙等爲劇縣令長十年權使賀齊討上饒分爲建平縣十二年西征黃祖虜其人民而還十三年春權復征黃祖祖先遣舟兵拒軍都尉呂蒙破其前鋒而凌統董襲等盡

銳攻之遂屠其城祖挺身亡走馮則追梟其首虜其男
女數萬口荊州牧劉表死權將魯肅乞奉命弔表二子
且以觀變肅未到而曹公已臨其境表子琮舉眾以降
劉備欲南濟江肅與相見因傳權旨爲陳成敗備進住
夏口使諸葛亮詣權權遣周瑜程普等行是時曹公新
得表眾形勢甚盛諸議者皆望風畏懼多勸權迎之公曹
與權書問近者奉辭伐罪旌麾南指劉琮束手今治水
軍八十萬眾方與將軍會獵於吳權得書以示羣臣莫
不嚮震惟瑜肅執拒之議意與權同瑜普爲左右督各
失色

領萬人與備俱進遇於赤壁大破曹公曹軍燒其餘船
引退士卒饑疫死者大半備瑜等復追至南郡曹公遂
北還留曹仁徐晃於江陵使樂進守襄陽權自率衆圍
合肥使張昭攻九江之當塗昭兵不利權攻城踰月不
能下曹公自荊州還遣張喜將騎赴合肥未至權退十
四年瑜仁相守歲餘所殺傷甚衆仁委城走權以瑜爲
南郡太守劉備表權行車騎將軍領徐州牧備領荊州
牧屯公安十六年權徙治秣陵十七年城石頭作濡須

塢十八年正月曹公攻濡須權與相拒月餘曹公望權

軍歎其齊肅乃退

曹公出濡須作油船夜渡洲上權以水軍圍取得三千餘人其沒溺者亦

數千人權數挑戰公堅守不出權乃自來乘輕船從濡須口入公軍諸將皆以爲是挑戰者欲擊之公曰此必

孫權欲身見吾軍部伍也勅軍中皆精嚴弓弩不得妄發權行五六里迴還作鼓吹公見舟船器仗軍伍整肅

喟然嘆曰生子當如孫仲謀劉景升兒子若豚犬耳十九年五月權征皖城閏月

克之獲廬江太守朱光及參軍董和男女數萬口是歲

劉備定蜀權以備已得益州令諸葛瑾從求荊州諸郡

備不許曰吾方圖涼州涼州定乃盡以荊州與吳耳權

曰此假而不反而欲以虛辭引歲遂置南三郡長吏關羽盡逐之權大怒遣呂蒙督鮮于丹徐忠孫規等兵三萬取長沙零陵桂陽三郡使魯肅以萬人屯巴丘巴丘今曰巴陵以禦關羽權住陸口爲諸郡節度蒙到二郡皆服惟零陵太守郝普未下會備到公安使關羽將三萬兵至益陽權乃召蒙等使還助肅蒙使人誘普普降盡得三郡將守因引軍還與孫皎潘璋并魯肅兵並進拒羽於益陽未戰會曹公入漢中備懼失益州使使求和權令

諸葛瑾報更尋盟好遂分荊州長沙江夏桂陽以東屬
權南郡零陵武陵以西屬備備歸而曹公已還權反自
陸口遂征合肥合肥未下徹軍還兵皆就路權與凌統
甘寧等在津北爲魏將張遼所襲統等以死扞權權乘
駿馬越津橋得去二十一年冬曹公次于居巢遂攻濡
須二十二年春權令都尉徐詳詣曹公請降公報使修
好誓重結婚二十四年關羽圍曹仁於襄陽曹公遣左
將軍于禁救之會漢水暴起羽以舟兵盡虜禁等精騎

三萬送江陵惟城未拔權內憚羽外欲以爲己功賤與
曹公乞以討羽自效曹公且欲使羽與權相持以鬪之
驛傳權書使曹仁以弩射示羽羽猶豫不能去閏月權
征羽先遣呂蒙襲公安獲將軍士仁蒙到南郡南郡太
守糜芳以城降蒙據江陵撫其老弱釋于禁之囚陸遜
別取宜都獲秭歸枝江夷道還屯夷陵守峽口以備蜀
關羽還當陽西討麥城權使誘之羽僞降立幡旗爲象
人於城上因遁走兵皆解散尚十餘騎權先使朱然潘

璋斷其徑路十二月璋司馬馬忠獲羽及其子平都督趙累等於章鄉遂定荊州曹公表權爲驃騎將軍假節領荊州牧封南昌侯二十五年正月曹公薨太子丕代爲丞相魏王是年冬魏受漢禪明年四月劉備稱帝於蜀權自公安都鄂魏文帝策封權爲吳王加九錫又明年正月權遣陸遜部將軍宋謙等攻蜀五屯皆破之所斬及投兵降者數萬人劉備奔走僅以身免初權外託事魏而誠心不款魏欲遣侍中辛毗尚書桓楷與權盟

誓并徵任子權辭讓不受魏乃命曹休張遼臧霸出洞
口曹仁出濡須曹真夏侯尚張郃徐晃圍南郡權遣呂
範等督五軍拒之權遂改元黃武臨江拒守使大中大
夫鄭全聘劉備於白帝然猶與魏文帝相往來至後年
乃絕八年春公卿百司皆勸權正尊號四月丙申遂即
皇帝位



冊府元龜卷一百八十三

欽定四庫全書

子部

冊府元龜卷一百八十四
五

詳校官中書臣涂日煥

員外郎_臣牛稔文覆勘

總校官庶吉士_臣何思鈞

校對官中書_臣李荃

謄錄監生_臣任楫文

欽定四庫全書

冊府元龜卷一百八十四 宋 王欽若等 撰

閏位部

勲業第二

宋高祖武皇帝漢高帝弟楚元王交二十一世孫初為
晉冠軍孫無終司馬安帝隆安三年十一月妖賊孫恩
作亂於會稽衛將軍謝琰前將軍劉牢之東討牢之請
帝參府軍事十二月牢之至吳而賊緣道屯結牢之命

帝與數十人覘賊遠近會遇賊至衆數千人高祖便進與戰所將人多死而帝意方厲手奮長刀所殺傷甚衆牢之子敬宣疑高祖淹久恐為賊所困乃輕騎尋之既而衆騎並至賊乃奔退斬獲千餘人推鋒而進平山陰恩遁還入海四年五月恩復入會稽殺衛將軍謝琰十月劉牢之復率衆東征恩退走牢之屯上虞使帝戍句章城既卑小戰士不盈數百帝常被堅執銳為士卒先每戰輒推鋒陷陣賊乃退還浹口時東伐諸帥御軍無

律士卒暴掠甚為百姓所苦唯帝法令明整所至莫不親賴焉五年春孫恩頻攻句章帝屢摧破之恩復走入海三月北出海鹽帝追而翼之築城於海鹽故治賊日來攻城城內兵力甚弱帝屢出破之

臣欽若等曰事具閏位謀畧門

五

月孫恩破滬瀆殺吳國內史袁山松死者四千人是月帝復破賊於婁縣六月恩乘勝浮海奄至丹徒戰士十餘萬劉牢之猶屯山陰京邑震動帝倍道兼行與賊俱至於時衆力既寡加以步遠疲勞而丹徒守軍莫有鬪志

恩率衆數萬鼓譟登蒜山居民皆荷楯而立帝率領數百奔擊大破之投嶽赴水死者甚衆恩以鼓排自載僅得還船雖被推破猶恃其衆力徑向京師樓船高大值風不得進旬日乃至白石尋知劉牢之已還朝廷有備遂走向鬱洲八月以帝為建武將軍下邳太守領水軍追討至鬱洲復大破恩恩南走十一月帝追恩於滄瀆及海鹽又破之三戰並大獲俘馘以萬數恩自是饑饉疾疫死者大半自決口奔臨海元興元年驃騎將軍司

馬元顯西伐荊州刺史桓玄亦率荆楚大衆下討元顯遣鎮北將軍劉牢之拒之帝參其軍事次淝洲玄至帝請擊之不許將遣子敬宣詣玄請和帝與牢之甥東海何無忌並固請不從遂遣敬宣詣玄玄克京邑殺元顯以牢之為會稽內史懼而告帝曰便奪我兵禍其至矣今當北就高雅於廣陵舉事卿能從我去乎答曰將軍以勁卒數萬望風降服彼新得志威震天下三軍人情都已去矣廣陵豈可得至耶吾當反復還京口耳牢

之叛走自縊死何無忌謂帝曰我將何之帝曰鎮北去
必不免卿可隨我還京口桓玄必不能守節北面我當
與卿圖之今方是玄矯情任筭之日必將用我輩也桓
玄從兄修以撫軍鎮丹徒以帝為中兵參軍孫恩自奔
敗之後徒旅漸散懼生見獲乃於臨海投水死餘衆推
恩妹夫盧循為主桓玄欲且緝寧東土以循為永嘉太
守循雖受命而肆暴不已五月玄復遣帝東征時循自
臨海入東陽二年正月玄復遣帝破循於東陽循奔永

嘉復追破之斬其大帥張士道追討至於晉安循浮海
南走六月加帝彭城内史十二月桓玄篡位帝從桓修
入朝玄見帝謂司徒王謐曰昨見劉裕風骨不常蓋人
傑也每遊集輒引接慙慙贈賜甚厚帝愈惡之或說玄
曰劉裕龍行虎步視瞻不凡恐不為人下宜早為之所
玄曰我方欲平蕩中原非劉裕莫可付以大事關隴平
定然後當別議之耳玄乃下詔曰劉裕以寡制衆屢摧
妖鋒汎海窮追十殄其八諸將力戰多被重創自元帥

以下至於將士並宜論賞以叙勲烈先是帝東征盧循何無忌隨至山陰勸於會稽舉義帝以為玄未據極位且會稽遙遠濟事為難俟其篡逆事著徐於京口圖之不憂不克至是桓修還京帝託以金創疾動不堪步從乃與無忌同船共還建興復之計於是與弟道規沛郡劉毅平昌孟昶任城魏詠之高平檀憑之琅邪諸葛長民太原王元德隴西辛扈興東莞童厚之並同義謀時桓修弟弘為征虜將軍青州刺史鎮廣陵道規為弘中

兵參軍昶為州主簿乃令毅潛往就昶聚徒於江北謀起兵殺弘長民為豫州刺史刁遠左軍府參軍謀據歷陽相應元德厚之謀於京邑聚眾攻玄并尅期齊發三年二月己丑朔乙卯帝託以遊獵與無忌等收集義徒凡同謀何無忌魏詠之詠之弟欣之順之檀憑之從子韶弟祇隆與叔道濟道濟從兄範之帝弟道憐沛郡劉藩河內向彌平昌孟懷玉管義之陳留周安穆臨淮劉蔚從弟珪之東莞臧喜從弟寶符從子穆生童茂宗陳

郡周道民漁陽田演譙國范清等二十七人願從者百餘人丙辰詰旦城開無忌服傳詔服稱詔居前義衆馳入齊聲大呼吏士驚散莫敢動即斬桓修以徇帝哭甚慟厚加殯斂孟昶勸弘其日出獵未明開門出獵人昶道規毅等率壯士五六十人因開門直入弘方噉粥即斬之因收衆濟江義軍初克京城修司馬刁弘率文武佐吏來赴帝登城謂之曰郭江州已奉乘輿反正於尋陽我等並被密詔誅除逆黨同會今日賊玄之首已當

梟於大航矣諸君非大晉之臣乎今來欲何為弘信之
收衆而退毅既至帝命誅弘衆推帝為盟主先移檄於
京邑曰夫治亂相因理不常泰狡馬肆虐或值聖明自
我大晉陽九屢構隆安已來難結皇室忠臣碎於虎口
貞良敵於豺狼逆臣桓玄陵虐人鬼阻兵荆郢肆暴都
邑天未亡難凶力繁興踰年之間遂傾皇祚主上播越
流幸非所神器沉淪七廟毀墜夏后之罹浞豷有漢之
遭莽卓方之於玄未足為喻自玄篡逆於今歷年亢旱

彌時民無生氣加以庶士疲於轉輸文武困於造築父子乖離室家分散豈唯大東有杼軸之悲操梅有傾筐之慨而已哉仰觀天文俯察人事此而能久孰有可亡凡在有心誰不扼腕裕等所以叩心泣血不遑啓處者也是故晝寐宵興拔獎忠烈潛構崎嶇險過履虎輔國將軍劉毅廣武將軍何無忌鎮北主簿孟昶兗州主簿魏詠之寧遠將軍劉道規龍驤將軍劉藩振威將軍檀憑之等忠烈斷金精貫白日荷戈奮袂志在畢命益州

刺史毛璩萬里齊契掃定荆楚江州刺史郭昶之奉迎
主上宮於尋陽鎮北參軍王元德等並率部曲保據石
頭揚武將軍諸葛長民收集義士已據歷陽征虜參軍
庾頤之等潛相連結以為內應同力協規所在蜂起即
日斬偽徐州刺史安城王修青州刺史弘首義衆既集
文武爭先咸謂不有一統則事無以輯裕辭不獲已遂
總軍要庶上憑祖宗之靈下罄義夫之力翦馘逋逆蕩
清京輦公侯諸軍或世樹忠貞或身荷爵寵而並俛省

猾豎自効莫繇顧瞻周道寧不弔乎今日之舉良其會也裕以虛薄才非古人接勢於已替之機受任於既頽之運丹誠未宣感慨憤躍望霄漢以永懷晒山川以增厲授檄之日神馳賊庭帝乃以孟昶為長史總攝後事檀憑之為司馬百姓願從者千餘人三月戊午朔遇吳甫之於江乘甫之玄驍將也其兵甚銳帝躬執長刀大呼以衝之衆皆披靡即斬甫之進至羅落橋皇甫敷率數千人逆戰寧遠將軍憑之與帝各御一隊憑之戰敗

見殺其衆退散帝進戰彌厲前後奮擊應時摧破即斬
數首玄聞敷等並沒愈懼使桓謙屯東陵口卞範之屯
覆舟山西衆合二萬己未旦義軍食畢棄其餘糧進至
覆舟山東使張旗幟於山上以為疑兵玄又遣武騎將
軍庾祿之配以精卒利器助謙等帝躬先士卒以奔之
將士皆殊死戰無不一當百呼聲動天地時東北風急
因命縱火煙焰張天鼓譟之音震京邑謙等諸軍一時
奔潰玄始雖遣軍置陣而走意已決別使領軍將軍殷

仲文具舟於石頭仍將子姪浮江南走庚申帝鎮石頭
城立留臺總百官焚桓溫神主於宣陽門外造晉新主立於
太廟遣諸將帥追立尚書王假率百官奉迎乘輿司徒
王謚與衆議推帝領揚州固辭乃以謚為錄尚書事領
揚州刺史以帝為使持節都督揚徐兗豫青冀幽并八
州諸軍事領軍徐州刺史先是朝廷承晉氏亂政
百司縱弛桓立雖欲釐整而衆莫從之帝以身範物先
威禁內外百官皆肅然奉職二三日間風俗頓改時諸

葛長民失期不發，乃遠執送之。未至而玄敗，玄經尋陽。江州刺史郭昶之備乘輿法物資之，玄收畧得二千餘人，挾天子走江陵。冠軍將軍劉毅輔國將軍何無忌振武將軍劉道規率諸軍追討。四月，奉武陵王遵為大將軍，承制大赦天下。唯桓玄一祖後不在赦例。玄子韶又聚眾向歷陽，高祖命輔國將軍諸葛長民擊走之。無忌道規破玄大將鄭鈐等於桑落州，眾軍進據尋陽。加高祖都督江州諸軍事。玄既還荆郢，大聚兵眾，召水軍造。

樓船器械率衆二萬挾天子發江陵浮江東下與冠軍將軍劉毅等相遇於崢嶸州衆軍大破之玄棄衆復挾天子還復江陵玄黨殷仲文奉晉二皇后還京師玄至江陵因西走南郡太守王騰之荊州別駕王康產奉天子入南郡府初征虜將軍益州刺史毛據遣從孫祐之與參軍費恬送弟喪州下有衆二百據弟子修之時為玄屯騎校尉誘玄以入蜀至枚回州恬與祐之迎射之益州都護馮遷斬玄首傳京師又斬玄子昇於江陵市初

玄敗於崢嶸州義軍以為大事已定追躡不速玄死幾
一旬衆軍猶不至玄從子振逃於華容之浦中招聚逆
黨數千人晨襲江陵城居民競出赴之玄從兄謙先匿
於沮川亦聚衆以應振為玄舉哀立喪庭謙乃率衆官
奉璽綬於安帝無忌道規既至江陵與桓振戰於靈溪
玄黨馮該又設伏于楊林義軍奔敗退還尋陽兗州刺
史辛禹懷貳會北青州刺史劉該反禹求征該次淮陰
又反禹長史羊穆之斬禹傳首十月帝領青州刺史甲

伏百人入殿劉毅諸軍復進至夏口毅攻魯城道規攻
偃月壘皆拔之十二月諸軍進平巴陵義熙元年正月
毅等至江津破桓謙桓振江陵平天子至江陵以帝為侍
中車騎將軍都督中外諸軍事使持節徐青二州刺史
帝固讓加錄尚書事又不受屢請歸藩天子不許遣百
僚敦勸又親幸帝第帝惶懼詣闕陳請天子不能奪是
月旋鎮丹徒天子重遣大使敦勸又不受乃改授都督
荆司梁益寧雍涼七州并前十六州諸軍事盧循浮海

破廣州二年三月督交廣二州十月帝上言曰昔天禍
皇室巨狡縱篡臣等義惟舊隸豫蒙國恩仰契信順之
符俯屬人臣之憤雖社稷之靈抑亦事繇衆濟其翼獎
忠勤之佐文武畢力之士孰執在己之謙用虧國體之
大輒申攝衆軍先上同謀起義始平京口廣陵二城臣
及撫軍將軍毅等二百七十二人并後赴義出都緣道
大戰所餘一千五百六十六人又輔國將軍長民故給
事中王元德等十人合一千八百四十八人乞正封賞其西

征衆軍須論集續上於是尚書奏封倡義謀主鎮軍將軍
裕豫章郡公食邑萬戶賜絹三萬疋其餘封賞各有差
鎮軍府佐吏降故太傅謝安府一等十一月天子重申
前令加帝侍中進號車騎將軍開府儀同三司因讓詔
遣百僚敦勸三年二月帝還京師將詣廷尉天子先詔
獄官不得受詣闕陳讓乃見聽旋於丹徒四年正月天
子徵帝入輔授侍中車騎將軍開府儀同三司揚州刺
史錄尚書徐兗二州刺史如故帝表解兗州先是遣冠

軍劉敬宣伐蜀賊譙縱無功而返九月以敬宣挫退遜位不許乃降為中軍將軍五年二月南燕鮮卑慕容超大掠淮北執陽平太守劉千載濟南太守趙元驅畧千餘家三月帝抗表北討以丹陽尹孟昶監中軍留府事四月舟師發京都泝淮入泗五月至下邳留船艦輜重步軍進琅邪所過皆築城留守鮮卑梁父莒城二戍並奔走六月慕容超遣五樓及廣寧王賀賴先據臨朐城既聞大軍至留羸老守廣固乃悉出臨朐有巨蔑水去

城四十里超告五樓曰急往據之晉軍得水則難擊也
五樓馳進龍驤將軍孟龍符領騎居前奔往爭之五樓
乃退衆軍步進有車四千兩分車為兩翼方軌徐行車
悉張幔御者執稍又以輕騎為游軍軍令嚴肅行伍齊
整未及臨朐數里賊鐵騎萬餘前後交至帝命兗州刺
史劉藩弟并州刺史道憐諮議參軍劉敬宣陶延壽參
軍劉懷玉慎仲道索邈等齊力擊之遣諮議參軍檀韶
直趨臨朐韶剋臨朐悉虜超輜重超聞臨朐已拔引衆

走帝親鼓之賊乃大奔超遁還廣固獲超馬偽輦玉璽
豹尾等送於京師斬其大將段暉等十餘人其餘斬獲千
餘計明日進軍廣固即屠大城超退保小城於是設長
圍守之圍高三丈外穿三重塹停江淮轉輸館穀於齊
土撫納降附華戎歡悅援才授爵因而任之七月詔加
帝北青冀二州刺史超大將垣遵遵弟苗並率衆歸順
帝方治攻具城上人曰汝不得張綱何能為也綱者超
偽尚書郎其人有巧思會超遣綱稱藩於姚興乞師請

救興偽許之而實憚帝不敢遣綱從長安還泰山太守
申宣執送之乃升綱於樓上以示城內城內莫不失色
於是使綱大治攻具超求救不獲綱反見虜轉憂懼乃
請稱藩求割大峴為界獻馬千匹不聽圍之轉急河北
居民荷戈負糧至者日以千數九月進帝太尉中書監
固讓十月張綱治攻具成設諸竒巧飛樓木幔之屬莫
不畢備城上火石弓矢無所用之六年二月丁亥屠廣
固超踰城走征虜賊曹喬胥獲之殺其王公以下納口

萬餘馬二千匹送超京師斬於建康市帝之北伐也徐道覆至番禺說盧循及循率衆過嶺寇南康廬陵豫章諸郡守皆委任奔走於時平齊問未至即馳使徵帝帝之初克齊也欲停鎮下邳清盪河雒既而被徵使至即日班師鎮南將軍何無忌與徐道覆戰於豫章敗績無忌被害內外震駭朝廷欲奉乘輿北走就帝尋知賊衆未至人情小安帝至下邳以船運輜重自率精銳步歸至山陽聞無忌被害則慮京邑失守乃卷甲兼行與數

十人至淮上問行旅以朝廷消息人曰賊尚未至劉公若還便無所憂也帝大喜單船過江逕至京口衆乃大安四月癸未帝至京師解嚴息甲循之初下也使道覆向尋陽自寇湘中諸郡荊州刺史道規遣軍至長沙為循所敗循逕至巴陵與道覆連旗而下帝以南藩覆沒表送章綬詔不聽五月劉毅敗績於桑落洲問至內外恟擾時北師始還多創痍疾病京師戰士不盈數千賊既破江豫二鎮戰士十餘萬舟車百里不絕奔敗還者

並聲其雄盛孟昶諸葛長民懼寇漸逼欲擁天子過江
帝不聽昶固請不止帝曰今重鎮外傾強寇內逼人情
危駭莫有固志若一旦遷動便自瓦解江北亦豈可得
至設令得至不過延日月耳今兵士雖少自足以一戰
若其克濟則臣主同休苟厄運必至我當以死衛社稷
橫尸廟門遂其繇來以身許國之志不能遠竄於草間
求活也我計決矣卿勿復言於是開賞募投身赴義者
一同登京城之上科發居民治石頭城建牙戒嚴帝率

劉毅諸葛長民北出拒之七月庚申羣賊自蔡州南走
還屯尋陽遣輔國將軍王仲德廣川太守劉鍾河間太
守蒯恩追之帝還東府大治水軍皆大艦重樓高者十
餘丈十月率兗州刺史劉藩寧朔將軍檀韶等舟師南
伐以後將軍劉毅監太尉留守府後事皆委焉是月徐
道覆率衆三萬寇江陵荊州刺史道規又大破之斬首
萬餘級道覆走還湓口初帝之遣索邈也邈在道為賊
所斷道覆敗後方達自循東下江陵斷絕京邑之間傳

者皆云已沒及邈至方知循走循初自蔡州南走留其親黨范崇民五千人高艦百餘戍南陵王仲德等聞大軍且至乃進攻之十一月大破崇民軍焚其舟艦收其散卒循廣州守兵不以海道為防是月建威將軍孫季高乘海奄至而城池峻整兵猶數千季高焚賊舟艦悉力而上四面攻之即日屠其城循又以輕舟奔始興季高撫其舊民戮其親黨勒兵謹守初帝之遣季高也衆咸以海道艱遠必至為難且分撤見力二三非要帝不

從勅李高曰大軍十二月之交必破妖虜卿今時當至
廣州傾其巢窟令賊奔走之日無所歸投季高受命而
行如期尅捷循方治兵艦設諸攻備帝欲御以長筭乃
屯軍雷池賊揚聲不攻雷池當乘流逕下帝知其欲戰
且慮賊敗或於京口入海遣王仲德以水艦三百於吉
陽下斷之十二月循道覆率衆數萬方艦而下前後相
抗莫見舳艫之際帝悉出輕利鬪艦躬提幡鼓命衆軍
齊力擊之又上步騎伏于西岸右軍參軍庾樂生乘艦

不進斬而徇之於是衆軍並踴騰爭先軍中多萬鈞神
弩所至莫不摧陷帝中流感之因風水勢賊艦悉泊西
岸上軍先備火具乃投火焚之煙焰張天賊衆大敗追
奔至夜乃歸循等還尋陽初分遣步軍莫不疑怪及燒
賊艦衆乃悅服召王仲德請還為前驅留輔國將軍孟
懷玉守雷池循聞大軍上欲走向豫章乃悉立柵斷左
里帝攻柵而進循兵雖殊死戰弗能禁諸軍乘勝奔之
循單舸走所殺及投水死凡萬餘人循收散卒尚有數

千人逕還廣州帝旋自左里天子遣侍中黃門勞師於
行所七年正月振旅於京師改授大將軍揚州牧二月
盧循於番禺為孫季高所破收餘衆南走劉藩孟懷玉
斬徐道覆於始興交州刺史杜慧度斬盧循傳首京師
八年四月以後將軍劉毅為荊州刺史毅與帝俱舉大
義興復晉室既有雄才大志厚自矜許與尚書僕射謝
混相結帝知毅不能居下終為異端密圖之毅表求從
弟兗州刺史藩以為副貳九月藩入朝帝收藩及混並

於獄賜死自表討毅壬午發自京師遣參軍王鎮惡襲江陵十月剋之毅及黨與皆伏誅十一月帝以西陽太守朱齡石為益州刺史率衆伐蜀進帝太傅揚州牧九年二月乙丑至自江陵初諸葛長民貪淫驕橫為士民所患劉毅既誅將謀作亂帝密命左右壯士丁旡等自幔後出於坐拉殺之死於牀側輿尸付廷尉并誅其弟黎民七月朱齡石平蜀斬偽主譙縱傳首京師十年荊州刺史司馬修之宗室之重又得江漢人心帝疑其有

欽定四庫全書

川原元鑑
卷一百八十四

異志而修之兄子譙王文思在京師招集輕俠帝執文思
送還修之令自為其所修之表廢文思十一年正月帝
收修之子文寶次子文祖并於獄賜死率衆軍西討三
月軍次江陵修之奔襄陽四月帝復率衆進討至襄陽
修之奔姚興八月甲子至自江陵十二年三月加中外
大都督初帝平齊乃有定關雒之意值盧循侵逼故其
事不諧荆雍既平方謀外畧會姚興死子泓立兄弟相
殺關中擾亂帝乃戒嚴北討加領征西將軍司豫二州

刺史又加北雍州刺史九月次于彭城加領徐州刺史
先是遣冠軍將軍檀道濟龍驤將軍王鎮惡步向許雒
羗緣道屯守皆望風降服偽兗州刺史韋華先據倉垣
亦率衆歸順帝又遣北兗州刺史王仲德先以水軍入
河仲德破索虜於東郡涼城進平滑臺十月衆軍至雒
陽圍金墉泓弟偽平南將軍洸請降送于京師修復晉
五陵置守衛天子以帝為相國封宋公加九錫十三年
正月帝以舟師進討二月檀道濟等次潼關三月庚辰

大軍入河後魏步騎十萬營據河津帝命諸軍濟河擊破之帝至雒陽七月至陝城龍驤將軍王鎮惡伐木為舟自河浮渭八月扶風太守沈田子大破姚泓於藍田王鎮惡尅長安生禽泓九月帝至長安長安豐稔帑藏盈積帝先收其彝器渾儀土圭之屬獻於京師其餘珍寶珠玉以班賜將帥執送姚泓斬於建康市十月進爵為王十四年正月還京固讓進爵六月受相國宋公九錫之命十二月晉大司馬琅邪王即位元熙元年徵公

入輔又申前命進爵為王七月乃受命二年四月徵王
入輔六月至京師晉帝禪位於宋遂即帝位

孝武帝文帝第三子元嘉十二年立為武陵王十六年
為湘州刺史十七年遷南豫州刺史並領石頭戍至二
十八年為江州刺史四郡諸軍事時緣江蠻為寇文帝
遣太子步兵校尉沈慶之等伐之使帝總統衆軍三十
年正月帝出次西陽之五洲會元凶劭弒逆以帝為征
南將軍帝率衆入討荊州刺史南譙王義宣雍州刺史

臧質並舉義兵四月辛酉次溧陽癸亥冠軍將軍柳元
景前鋒至新亭脩建營壘甲子賊劭親率衆攻元景大
敗退走丙寅帝次江寧丁卯大將軍江夏王義恭來奔
表上尊號戊辰至於新亭己巳即皇帝位五月甲戌輔
國將軍申坦克京城乙亥輔國將軍朱修之克東府丙
申克定京邑劭及始興王濬諸同逆並伏誅庚辰解嚴
南齊太祖高皇帝宋右軍將軍南泰山太守承之之子
年十三治禮及左氏春秋宋元嘉十七年大將軍彭城

王義康出鎮豫章承之領兵防守帝捨業南行十九年
竟陵蠻動文帝遣帝領偏軍討河北蠻二十一年伐魏
至丘檻山並破走二十三年雍州刺史蕭思話鎮襄陽
啓帝自隨戍沔北討樊鄧諸山蠻破其聚落初為左軍
中兵參軍二十七年魏軍圍汝南戍主陳憲臺遣寧朔
將軍臧質安蠻司馬劉康祖救之文帝使帝宣旨授節
度聞魏太武向彭城質等回軍救援至盱眙帝與質別
軍主胡宗之等五軍步騎數千人前驅魏主已潛過淮

卒相遇於莞山下合戰敗績緣淮奔退宗之等皆陷沒
帝還就質固守為虜所攻圍甚危急事寧還京師二十
九年領偏軍征仇池梁州西界舊有武興戍晉隆安中
沒屬氐武興西北有蘭臯戍去仇池二百里帝擊二壘
皆破之遂從谷口入關未至長安八十里梁州刺史劉
秀之遣司馬馬汪助帝攻談堤城拔之虜偽河間公奔
走虜救兵至帝軍力疲少乃燒城還南鄭襲爵晉興縣
五等男孝建初除江夏王大司馬參軍隨府轉太宰遷

員外直閣中書舍人西陵王撫軍參軍建康令新安王
子鸞有盛寵簡選僚佐為北軍中郎中兵參軍母陳氏
憂起為武烈將軍復為建康令中兵如故景和中除後
軍將軍值明帝立為右軍時四方反叛會稽太守尋陽
王子房及東諸郡皆起兵加輔國將軍率眾東討至晉
陵與賊前鋒將程捍孫曇瓘等戰一日破賊十二壘分
軍定諸縣晉陵太守袁標棄城走東境諸城相繼奔散
徐州刺史薛安都反彭城遣從子索兒寇淮陰山陽太

守程天祚舉城叛徐州刺史申令孫又降徵帝討之時
帝平東賊還又將南討出次新亭前軍已發而索兒自
睢陵渡淮馬步萬餘人擊殺臺軍主孫耿縱兵逼前軍
張永營告急明帝聞賊渡遽追帝往救之屯破釜索兒
向鍾離永遣寧朔將軍王寬據盱眙遏其歸路索兒擊
破臺軍主高道慶走之於石鼈將西歸王寬與軍主任農夫
先據白鵝澗張永遣帝馳督寬索兒東要擊帝使不得
前帝鼓行結陣直入寬壘索兒望見不敢發經數日索

兒引軍頓石梁帝追之至葛冢候騎還云賊至帝乃頓
軍引管分兩馬軍夾營外以待之俄頃馬步奄至又推
火車數道攻戰相持移日乃出輕兵攻賊西使馬軍合
擊其後賊衆大敗追奔獲其器仗進屯石梁澗北索兒
夜遣千人來斫營營中驚帝臥不起宣令左右按部不
得動須臾賊散帝議欲於石梁西南高地築壘通南道
斷賊走路索兒果來爭之帝率軍擊破之賊馬自相踐
藉死索兒走向鍾離帝追至黯黯而還除驍騎將軍封

西陽縣侯邑六百戶遷巴陵王衛軍司馬鎮會稽江州
刺史晉安王子勛遣臨川內史張淹自鄱陽嶠道入三
吳臺軍主沈思仁與偽龍驤將軍任皇鎮西參軍劉越
緒各據險相守明帝遣帝領三千人討之夜舉火進軍
賊望見恐懼未戰而走還除桂陽王征北司馬南東海太
守行南徐州事初明帝遣張永沈攸之以衆喻降薛安
都安都引魏軍敗沈攸之於彭城淮南孤弱以帝為假
冠軍將軍持節都督北討前鋒諸軍事鎮淮陰泰始三

年沈攸之吳喜北敗於睢口諸城戍大小悉奔歸虜遂
退至淮北圍角城戍主賈法度力弱不敵諸將勸帝渡
岸救之帝不許遣軍主高道慶將數百張弩浮艦淮中
遙射城外虜弩一發數百箭俱去虜騎相引避之乃命
進戰城圍即解遷督南兗徐二州諸軍事南兗州刺史
五年進督青冀三州刺史六年除黃門侍郎領越騎
校尉不拜復授冠軍將軍留本任明帝常嫌帝非人臣
相而民間流言云蕭道成當為天子明帝愈以為疑遣

冠軍將軍吳喜以三千人北使令喜留軍破釜自持銀壺酒封賜帝帝戎服出門迎即酌飲之喜還明帝意乃悅七年徵還京師部下勸勿就徵帝曰諸卿闇於見事主上自誅諸弟為太子稚弱作萬歲後計何關他族唯應速發事緩必見疑今骨肉相害非靈長之運禍難將興方與卿等戮力耳拜散騎常侍太子左衛率時帝世子以功當別封贛縣帝以一門二封固辭不受詔許之加邑三百戶明帝遣詔為右衛將軍領衛尉加兵五百

人與尚書令袁粲護軍褚淵領軍劉劭共掌機事又別
領東北選事尋解衛尉加侍中領石頭戍軍事初明帝
誅戮藩戚江州刺史桂陽王休範以人凡獲全及蒼梧
王立更有窺伺覬望密與左右閹人於後堂習馳馬招
聚亡命元徽二年五月興兵於尋陽收畧官民數日便
辦衆二萬人騎五百匹發盆口悉乘商旅船舫大雷戍
主杜道欣鵲頭戍主劉謩期告變朝廷惶駭帝與護軍
褚淵征北張永領軍劉劭僕射劉秉游擊將軍戴明寶

騎將軍阮佃夫右軍將軍王道隆中書舍人孫千齡員外郎楊運長集中書省計議莫有言者帝曰昔上流謀逆皆因淹緩至於覆敗休範必懲前失急下乘我無備今應變之術不宜念遠若偏師失律則大阻衆心宜頓新亭白下堅守宮掖東府石頭以待賊千里孤軍後無委積求戰不得自然无解我請頓新亭以當其鋒征北可以見甲守白下中堂舊是置兵地領軍宜頓宣陽門為諸軍節度諸貴安坐殿中右軍諸人不須競出我

自前驅破賊必矣因索筆下議並注同孫千齡與休範
有密契獨曰宜依舊遣軍據梁山魯顯問右衛若不出
白下則應進頓南州帝正色曰賊今已近梁山豈可得
至新亭即是兵衝所以欲死報國耳常日乃可屈曲相從
今不得也坐起帝顧謂劉劭曰領軍已同鄙議不可改
易乃單車白服出新亭加帝使持節都督征討諸軍平
南將軍加鼓吹一部治新亭城壘未畢賊前軍已至帝
方解衣高臥以安衆心乃索白虎幡登西垣使寧朔將

軍高道慶羽林監陳顯達員外郎王敬則浮舸與賊水戰自新林至赤岸大破之燒其船艦死傷甚衆賊步上新林帝馳使報劉劬急開大小桁撥淮中船舫悉渡北岸休範乘肩輿率衆至壘上遣寧朔將軍黃回馬軍主周盤龍將步騎出壘對陣休範分兵攻壘東短兵接戰自己至午衆皆失色帝曰賊雖多而亂尋破也楊運長領三齊射手七百人引強命中故賊不得逼城未時張敬兒斬休範首帝遣隊主陳靈寶送首還臺靈寶路中

遇賊軍埋首道側臺軍不見休範首愈疑懼賊衆亦不知
休範已死別率杜黑蠡急攻壘東司空主簿蕭惠朗領數
百人突入東門叫譟至堂下城上守門兵披退帝挺身
上馬率數百人出戰賊皆推楯而前相去數丈分兵橫
射帝引蒲將發左右將戴仲緒舉楯杆之箭應手飲羽
傷百餘人賊死戰不能當乃却衆軍復得保城與黑蠡拒戰
自晡達明旦矢石不息其夜大雨鼓叫不復相聞將士
積日不得寢食軍馬夜驚城內亂走帝秉燭正坐厲聲

呵止之如是者數四賊帥丁文豪設伏破臺軍於皂莢橋直至朱雀桁劉劬欲開桁王道隆不從劬及道隆並戰沒賊進至杜姥宅車騎典籤茅恬開東府納賊冠軍將軍沈懷明於石頭奔散張永潰於白下宮內傳新亭亦陷太后執蒼梧王手泣曰天下敗矣帝遣軍主陳顯達任農夫張敬兒周盤龍等從石頭濟淮間道從承明門入衛宮闕休範既死典籤許公輿詐稱休範在新亭士庶惶惑詣壘投名者千數帝隨得輒燒之乃列兵登城

北謂曰劉休範父子先昨皆已即戮屍在南岡下身是
蕭平南諸君善見觀君等名皆已焚除勿有懼也臺分
遣衆軍擊杜姥宅宣陽門諸賊皆破平之帝振旅凱入
百姓緣道聚觀曰全國家者此公也帝與袁粲褚淵劉秉
引咎解職不許遷散騎常侍中領軍都督南兗徐青冀
五州諸軍事鎮軍將軍南兗州刺史持節如故進爵公
增邑二千戶帝固讓又與褚淵袁粲書述讓意淵粲答
書固勸乃受命帝欲分其功請益粲等戶四年加尚書

左僕射本官如故休範平後蒼梧王漸行凶暴南徐州刺史建平王景素少有令譽朝野歸心景素亦潛為自全之計布款誠於帝帝拒而不納七月羽林監袁祗奔景素使舉兵帝出屯玄武湖遣衆軍北討事平乃還帝威名既重蒼梧深相猜忌幾加大禍陳太妃罵之曰蕭道成有功於國今若害之後誰復為汝著力者乃止帝密謀廢立五年七月戊子楊玉夫陳奉伯等二十五人殺蒼梧王持首送帝帝夜開承明門乘常所騎馬走入

殿中驚怖既知蒼梧王死咸稱萬歲己丑帝戎服
出殿召袁粲褚淵劉秉等議迎立順帝甲午帝移鎮東
府與粲等各甲仗五十人入殿丙申進位侍中司空錄
尚書事驃騎大將軍封竟陵郡公邑五千戶給油幢絡
車班劍三十人帝固辭上命即驃騎大將軍開府儀同
三司庚戌進督南徐州刺史封楊玉夫等二十五人爵
邑各有差十月戊辰又進督豫司二州初荊州刺史沈
攸之與帝同直殿省申以歡好帝以長女妻攸帝既廢
之第三子文和

立攸之舉兵東下京師恐懼是歲十二月乙卯帝入居
朝堂命諸將西討前湘州刺史王蘊太后兄子遭母喪
罷任還至巴陵停舟一月與攸之密相交構還至東府
期帝出弔帝既不出外謀愈固司徒袁粲尚書令劉秉
見帝威權稍盛慮不自安與蘊相結舉事帝遣諸將攻
石頭並禽斬之帝屯閱武堂馳結軍旅閏月辛丑詔假
黃鉞率大衆出屯新亭中興堂治嚴築壘二年正月攸
之攻郢城不克衆潰自經死傳首京邑丙子帝旋鎮東

府二月癸未加太尉增封三千戶都督南徐南兗徐兗
青冀司豫荆雍湘郢梁益廣越十六州諸軍事帝解驃
騎辭都督不許乃表送黃鉞三月己酉增班劔為四十
人甲仗百人入殿丙子加羽葆鼓吹辛卯封帝為齊公
備九錫之禮加璽紱遠遊冠位在諸王公上加相國綠
紱綬其驃騎大將軍揚州牧南徐州刺史如故三讓公
卿敦勸固請乃受甲寅策相國齊公曰天地變通莫大
乎炎涼懸象著明莫崇乎日月嚴冬播氣貞松之操自

高光景時昏若華之暎彌顯是故英睿當亂而不回忠
賢臨危而盡節自景和昏虐王綱弛紊太宗受命紹開
中興運屬屯難四郊多壘肅將軍威實資義烈康國濟
民於是乎在朕以不造夙罹閔凶嗣君失德書契未絕
威侮五行虔劉九縣神厭靈繹海水羣飛彘器已塵宗
裡誰主綴旒之殆未足為譬豈直小宛興刺黍離作歌
而已哉天贊皇宗實啓明宰爰登寡昧纂茲大業鴻緒
再維宏基重造高勲至德振古絕倫昔保衡翼殷博陸

佐漢方斯茂如也今將授公典禮其敬朕命乃者袁鄧

構禍

臣欽若等曰袁鄧鄧琬舉兵向闕

實繁有徒子房不臣

臣欽若等曰尋陽王

子房舉兵反齊公東討平之

稱兵協亂跨蹈五湖憑陵吳越浮侵虧

辰沉氛晦景桴鼓振於王畿鋒鏑交乎天邑顧瞻宮掖

將成茂草言念邦國翦為仇讐當此之時人無固志公

投袂殉難超然奮發執金板而先馳登寅車而戒路軍

政端嚴卒乘輯睦麾鉞一臨凶黨冰泮此則霸業之基

勤王之始也安都背叛

臣欽若等曰薛安都為徐州刺史引魏軍侵叛

竊據徐

方敢率犬羊陵虐淮潞索兒愚悖

臣欽若等曰索兒安都從子也攻淮陰齊

公破走之

同惡相濟天祚無狀背順歸逆北鄙黔黎奄墜塗

炭均人廢職邊師告警公授命宗枋精貫朝日擁節私

門氣踰霄漢破釜之捷斬馘蔽野石梁之戰禽其渠師

保境全民江陽即序此又公之功也張淹迷昧

臣欽若等曰晉

安王子節遣臨川內史張淹自都陽入三吳齊公討之

弗顧本朝爰自南區志圖

東夏潛軍間入竊覲不虞於時江服未夷皇塗薦阻公

忠誠慷慨在險彌亮深識九變妙察五色以寡制衆所

向風偃朝廷無東顧之憂閩越有來蘇之慶此又公之

功也匈奴野心侵掠疆場前師失律王旅摧撓灑血成

川伏尸千里醜羯俯張勢振彭泗

臣欽若等曰
羯言魏軍也

乘勝長

驅窺覲京甸冠帶之軌將湮被髮之容行及公奉辭伐

罪戒旦晨征兵車始交氛祲蕩滌弔死撫傷弘宣皇澤

俾我淮淝復沾盛化此又公之功也自茲厥後獫狁孔

熾封豕長蛇重窺上國而世故相仍師出日老戰士無

臨陣之心戎卒有懷歸之思是以下邳精甲望風振恐

角城高壘指日淪陷公眷言王事發憤忘食躬擐甲胄
視險若夷短兵纜接巨猾鳥散分疆畫界開創青兗此
又公之功也泰始之末入參禁旅任兼軍國事同顧命

桂陽負衆

臣欽若等曰桂陽王休範為江州刺史舉兵向闕

輕問九鼎裂冠毀

冕拔本塞原揮戈萬乘之國頓戟象魏之下烈火焚於
王城飛矢集於君幄機變倏忽終古莫二羣后憂惶元
戎無主公按劍凝神則竒謀貫世秉旄指麾則懦夫成
勇曾不崇朝新亭獻捷信宿之間宣陽底定雲霧廓清

區宇康乂此又公之功也皇室多難釁起戚藩邦皆應

韓翻為讐敵建平失圖

臣欽若等曰建平王景素為南徐州刺史舉兵為自全之計

興兵內侮公又指授六師義形乎色役未踰旬朱方寧

晏此又公之功也蒼梧肆虐

臣欽若等曰蒼梧王即後廢帝也

諸夏靡

沸淫刑以逞誰則無罪火災崑崗玉石俱焚黔首相悲

朝不謀夕高祖之業已淪文明之軌誰嗣公遠稽殷漢

之儀近遵魏晉之典猥以眇躬入奉宗祏七廟清謚九

區反正此又公之功也袁粲無質劉秉攜貳

臣欽若等曰司徒袁

梁尚書令劉秉
為黃回內應

韞述相扇成此亂階

臣欽若等曰領軍劉韞秉弟也述簡

未獲

醜圖潛構危機竊發據有石頭志犯應路公神謨內

運霜鋒外舉妖氛載澄國塗悅穆此又公之功也沈攸

之包藏禍釁

臣欽若等曰攸之為荆州刺史舉兵攻郢城

歲月茲彰蜂目豺

聲阻兵安忍哀彼荆漢獨為匪民乃眷西顧緬同異域

而經綸維始九伐未申長惡不悛遂逞凶逆驅合奸回

勢過虓虎朝野憂疑三軍沮氣公秉鉞出關凝威江甸

正情與敵日同亮明畧與秋雲競爽至義所感人百其

心鼓鼓一麾黔首寧謐雲梯未舉魯山克定積年逋誅
一朝顯戮沮浦安流章臺從軌此又公之功也公有濟
天下之勲重之以明哲道庇生民志扶宇宙戮力一心
劬勞王室自東徂西靡有寧晏險阻艱難備嘗之矣若
乃締構宗社之勤造物資始之澤雲布霧散光被六幽
弼予一人永清四海是以秬草騰芳於郊園景星垂暉
於清漢遐方欵關而慕義荒服重譯而來庭遐哉邈乎
無得而名焉朕聞疇庸表德前王盛典崇樹侯伯有國

攸同所以文命成功玄珪顯錫姬旦秉哲曲阜啓藩或
改玉以宏風或祚土以宣化禮絕常班寵冠羣辟爰逮
桓文車服異數惟公勲業超於先烈而褒賞闕於舊章
古今之道何其爽歟靜言欽歎良有缺然今進授相國
以青州之齊郡徐州之梁郡南徐州之蘭陵魯郡琅邪
東海晉陵義興揚州之吳郡會稽凡十郡封公為齊公
錫茲玄土苴以白茅定爾邦家用建冢社斯實尚父故
藩世作盟主紀綱侯甸率繇舊則往者周召建國師保

兼任毛畢執珪入作卿士內外之寄同規在昔可命使

持節兼太尉侍中中書監司空衛將軍零都縣開國侯

淵

即褚淵也

授相國印綬齊公璽紱持節兼司空副守尚書

令僧虔

王僧虔也

授齊公茅土金虎符第一至第五左竹使

符第一至第十相國位總百辟秩踰三事職以禮移號

隨事革其以相國總百辟去錄尚書之稱送所假節侍

中貂蟬中外都督太尉印綬竟陵公印策其驃騎

大將軍揚州牧南徐州刺史如故又加公九錫其敬聽

後命以公秉禮宏律儀刑區宇遐邇一體民無異業是
用錫公大輅各一玄牡二駟公崇脩南畝所寶惟穀王
府充實百姓繁阜是用錫公衮冕之服赤烏副馬公居身以
謙導物以義銘鈞庶品罔不和悅是用錫公軒縣之樂六佾
之舞公翼贊王猷聲教遠洽蠻夷竭歡回首內附是用
錫公朱戶以居公明鑒人倫澄辨涇渭官方與能英乂
克舉是用錫公納陛以登公保佑皇朝厲身化下杜漸
防萌含生寅式是用錫公虎賁之士三百人公禦宍以

刑禦奸以德君親無將將而必誅是用錫公鈇鉞各一
公鳳舉四維龍騫八表威靈所振異域同文是用錫公
彤弓一彤矢百旅弓十旅矢千公明發載懷肅恭禋祀
孝敬之重義感靈祇是用錫公秬鬯一卣珪瓚副焉齊
國置丞相以下一遵舊式往欽哉其祇聽朕命經緯乾
坤宏亮洪業茂昭爾大德闡揚我高祖之休命又詔齊
公十郡之外隨宜除用齊國初建給錢五百萬布五千
疋絹千疋四月癸酉詔進齊公爵為王九月丙午進位

假黃鉞都督中外諸軍事太傅領揚州牧劔履上殿入朝不趨贊拜不名置左右長史司馬從事中郎掾屬各四人使持節太尉驃騎大將軍錄尚書南徐州刺史如故固辭詔遣敦勸乃受黃鉞辭殊禮甲寅給三望車三年正月丁巳命太傅府依舊辟召丁卯給甲仗五百人出入殿省甲午重申前命劔履上殿入朝不趨贊拜不名三月甲辰增封陳郡潁川陳留南兗州之盱眙山陽秦郡廣陵南沛十郡改立王社丙戌命齊王冕十有二

旒建天子旌旗出警入蹕乘金根車駕六馬備五時副
車置旒頭雲竿樂舞八佾設鍾簷宮縣王世子為太子
王女王孫爵命一如舊儀辛卯宋帝禪位甲午遂即皇帝
位

世祖武皇帝高帝長子初仕宋為尋陽國侍郎辟州西
曹書佐出為贛令江州刺史晉安王子勛反帝不從命
南康相沈肅之繫帝於郡獄族人蕭欣祖門客桓康等
破獄迎出帝肅之率將吏數百人追擊帝與左右拒戰

生獲肅之斬首百餘級遂率部曲百餘人舉義兵始與相殷孚將萬兵赴子勛於尋陽或勸帝擊之帝以衆寡不敵避屯揭陽山中聚衆至三千人子勛遣其將戴凱之為南康相及軍主張宗之千餘人助之帝引兵向郡擊凱之別軍主程超數百人於南康口又進擊宗之破斬之遂圍郡城凱之以數千人固守帝親率將士盡日攻之城陷凱之奔走殺偽贛令陶冲之帝即據郡城遣軍主張應期鄧惠貞三千人襲豫章子勛遣軍王談秀

之等七千人與應期相拒於西昌築營壘交戰不能決
聞帝將自下秀之等退散事平徵為尚書庫部郎征北
中兵參軍元徽四年累遷晉熙王鎮西長史江夏內史
行郢州事順帝立徵晉熙王燮為撫軍揚州刺史以帝
為左衛將軍輔燮俱下沈攸之事起未得朝廷處分帝
以中流可以待敵即據盆口城為戰守之備高帝聞之
喜曰此真我子也帝表求西討不許乃遣偏軍援郢平
西將軍黃回等皆受帝節度加冠軍將軍持節昇明二

年事平轉散騎常侍都督江州豫州之新蔡晉熙二郡
軍事征虜將軍江州刺史封閩喜縣侯二千戶其年徵
侍中領軍將軍尋加督京畿諸軍事三年加尚書僕射
中軍大將軍開府儀同三司進爵為公給班劔二十人
齊國建為世子高帝即位為皇太子建元四年三月即
皇帝位

冊府元龜卷一百八十四